

四庫全書

集部

欽定四庫全書

集部

東坡全集卷二十七至

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官編修臣戴聯奎

謄錄監生臣吳翰

欽定四庫全書

東坡全集卷十七

宋 蘇軾 撰

詩八十八首

贈李道士

并叙

駕部員外郎李君宗固景祐中良吏也守漢州有道士
尹可元精練善畫以遺火得罪當死君緩其獄會赦獲
免時可元年八十一自誓且死必為李氏子以報可元
既死二十餘年而君子世昌之婦夢可元入其室生子

金史曰唐公言 卷十七
曰得柔小名蜀孫幼而善畫既長讀莊老喜之遂為道士賜號妙應事母以孝謹聞其寫真蓋妙絕一時云

世人只數曹將軍誰知虎頭非癡人腰間大羽何足道
頰上三毛自有神平生狎侮諸公子戲著幼輿巖石裏
故教世世作黃冠布襪青鞋弄雲水千年鼻祖守關門
一念還為李耳孫香火舊緣何日盡丹青餘習至今存
五十之年初過二衰顏記我今如此他時要指集賢人
知是香山老居士

樂天為翰林學士
奉詔寫真集賢院

次韻張舜民自御史出倅虢州留別

玉堂給札氣如雲，初喜湘纍復佩銀。
樊口淒涼已陳迹，

昔與張同遊武昌樊口來詩中及之

班心突兀見長身。

臺史謂御史立處為班心

江湖

前日真成夢，鄴杜他年恐。
卜隣此去若容陪，坐嘯故應容主盡詩人。

次韻米黻二王書跋尾二首

三館曝書防蠹毀，得見來禽與青李。
秋蛇春蚓久相雜，野鷺家雞定誰美。
玉函金籙天上來，紫衣敕使親臨啟。

紛綸過眼未易識磊落挂壁空雲委歸來妙意獨追求
坐想蓬山二十秋怪君何處得此本上有桓玄寒具油
巧偷豪奪古來有一笑誰似癡虎頭君不見長安永寧
里王家破垣誰復修

元章作書日千紙平生自苦誰與美畫地為餅未必似
要令癡兒出饒水錦囊玉軸來無趾粲然奪真疑聖智
恐饑看書淚如洗至今魯公餘乞米

次韻宋肇惠澄心紙二首

詩老囊空一不留百當曾作百金收

永叔以澄心百幅遺聖俞聖俞有詩

知君也厭雕肝腎分我江南數斛愁

君家家學陋相如宜與諸儒論石渠古紙無多更分我
自應給札奏新書

郭熙秋山平遠二首

目盡孤鴻落照邊遙知風雨不同川此間有句無人見
送與襄陽孟浩然

木落騷人已怨秋不堪平遠發詩愁要看萬壑爭流處

他日終煩顧虎頭

送歐陽辯監澶州酒

汗血駕鼓車何從致千里紛紛糟麴間欲試賢公子君
家江南英濯足滄浪水卻渡舊黃河漲沙埋馬耳由來
付造物倚伏何窮已當念楚子文三仕無愠喜

九月十五日通英講論語終篇賜執政講讀史
官燕于東宮又遣中使就賜御書詩各一首
臣軾得紫薇花絕句其詞云絲綸閣下文書

靜鐘鼓樓中刻漏長
獨坐黃昏誰是伴
紫薇花對紫薇郎
翌日各以表謝又進詩一篇臣

軾詩云

繡裳畫袞雲垂地
不作成王翦桐戲
日高黃繖下西清

風動槐龍舞交翠

通英閣前有雙槐
穆然屬地如龍形

壁中蠹簡今千年

漆書蝌蚪光射天
諸儒不復憂叨燥
東宮賜酒如流泉

酒酣復拜千金賜
一紙驚鸞回鳳宇
蒼顏白髮便生光

袖有驪珠三十四

臣所賜詩并題目及
臣姓名凡三十四字

歸來車馬已喧闐

爭看銀鉤墨色鮮人間一日傳萬口喜見雲章第一篇

上前此未嘗以
御書賜羣臣

玉堂畫掩文書靜鈴索不搖鐘漏永莫

言美筆數行書須信時平由主聖犬羊散盡沙漠空捷

烽夜到甘泉宮似聞指麾築上郡已覺談笑無西戎

時照

河新獲鬼章是日涇原復
奏夏賊數十萬人皆遁去

文思天子師文母終閉玉關

辭馬武小臣願對紫薇花試草尺書招贊普

謹按唐制翰林學士

帝知制誥許緘中書舍人班今臣以知
制誥待罪禁林故得以紫薇為故事

和王晉卿

并叙

駙馬都尉王詵晉卿功臣全彬之後也元豐二年予得罪貶黃岡而晉卿亦坐累遠謫不相聞者七年予既召用晉卿亦還朝相見殿門外感歎之餘作詩相屬託物悲慨阨窮而不怨泰而不驕憐其貴公子有志如此故次其韻

先生飲東坡獨舞無所屬當時挹明月對影三人足醉眠草棘間蟲虺莫予毒醒來送歸鴈一寄千里目悵焉懷公子旅食久不玉欲書加餐字遠託西飛鵠謂言相

濡沫未足救溝瀆吾生如寄耳何者爲禍福不如兩相
忘昨夢那可逐上書得自便歸老湖山曲躬耕二頃田
自種十年木豈知垂老眼却對金蓮燭公子亦生還仍
分刺史竹賢愚有定分尊俎守尸祝文章何足云執技
等醫卜朝廷方面顧羌虜驕未伏遙知重陽酒白羽落
黃菊羨君真將家浮面氣可掬

表天罡語實執君語則
赤氣浮面爲將勿多殺人

何當請長纓一戰河湟復

謝王澤州寄長松兼簡張天覺二首

莫道長松浪得名能教覆額兩眉青
便將徑寸同千尺知有奇功似茯苓

憑君說與埋輪使速寄長松作解嘲

送張天覺詩有埋輪及河東陞之語

無復青黏和漆葉枉將鍾乳敵仙茅

次韻劉貢父所和韓康公憶持國二首

夢覺真同鹿覆蕉相君脫屣自參寥
顏紅底事髮先白室邇何妨人自遥
狂似次公應未怪醉推東閣不須招
援毫欲作衣冠表盛事終當繼八蕭

唐蕭氏自瑀及邁八宰相

閉戶端居念獨深小軒朱檻憶同臨燎須誰識英公意

英公為其

姊作粥燎須曰吾與

黃髮聊知子建心

子建與楚王彪別詩云王其愛

姊皆老矣能幾進粥

玉體共享

已託西風傳絕唱且邀明月伴孤斟他時內

黃髮期

集應呼我下客先判醉墮簪

次韻劉貢父叔姪尾駕

玉堂孤坐不勝清長羨枚鄒接長卿只許隔牆聞置酒
時因議事得聯名機雲似我多遺俗廣受如君不治生
共託屬車塵土後鈞天一餉夢中榮

次韻韓康公置酒見留

庭下黃花一醉同重來雪嶽已穹窿不應屢費譏安石
但使毋多酌次公鍾乳金釵人似玉鴉絃鐵撥生生風
少卿尚有車茵在頗覺寬容勝弱翁

次韻王都尉偶得耳疾

君知六鑿皆為贅我有一言能決疣病客巧聞牀下蟻
癡人強覩棘端猴聰明不在根塵裏藥餌空為婢僕憂
但試周郎看聾否曲音小誤已回頭

送喬全寄賀君六首

叙并

舊聞靖長官賀水部皆唐末五代人得道不死章聖皇帝東封有謁於道左者其謁云晉水部員外郎賀亢再拜而去上不知也已而閱謁見之大驚物色求之不可得天聖初又使其弟子喻澄者詣闕進佛道像直數千萬張公安道與澄遊具得其事又有喬全者少得大風疾幾死賀使學道今年八十益壯盛人無復見賀者而全數見之元祐二年十二月全來京師十許日予留之

不可曰賀以上元期我於蒙山又曰吾師嘗遊密州識
君於常山道上意若喜君者作是詩以送之且作五絕
句以寄賀

君年二十美且都初得惡疾墮眉鬚紅顏白髮驚妻孥

覽鏡自嫌欲棄軀結茅窮山啖松腴路逢逃秦博士盧方

瞳照野清而臞再拜未起煩一呼覺知此身了非吾炯

然蓮花出泥塗隨師東遊渡淮邦

淮邦密州
二水名

山頭見我

兩輪朱豈知仙人混屠沽爾來八十胸垂胡上山如飛

嗔人扶東歸有約不敢渝
新年當參老仙儒
秋風西來下雙鳧
得棗如瓜分我無

生長兵間早脫身
晚為元祐太平人不驚
渤澥桑田變來看
龜蒙漏澤春

曾謁東封玉輅塵
幅巾短褐亦逡巡
行宮夜奏空名姓
悵望雲霞縹緲人

垂老區區宜為身微言
一發重千鈞
始知不見高皇帝
正似商山四老人

舊聞父老晉郎官已作飛騰變化看聞道東蒙有居處
願供薪水看燒丹

千古風流賀季真最憐嗜酒謫仙人狂吟醉舞知無益
粟飯藜羹問養神

送家安國教授歸成都

別君二十載坐失兩鬢青吾道雖艱難斯文終典刑屢
作退飛鷗羞看乾死螢一落戎馬間五見霜葉零夜談
空說劒春夢猶橫經新科復舊貫童子方乞靈頂頰凌

雲手去作入蜀星蒼苔高朕室古栢丈翁庭初聞編簡
香始覺鋒鏑腥岷峨有雛鳳梧竹養脩翎嗚呼應嶰律
飛舞集虞廷吾儕便歸老亦足慰餘齡

和子由除夜元日省宿致齋三首

江淮流落豈關天禁省相望亦偶然等是新年未相見
此身應坐不歸田

白髮蒼顏五十三家人強遣試春衫朝回兩袖天香滿
頭上銀幡笑阿咸

當年踏月走東風坐看春闌鎖醉翁白髮門生幾人在
却將新句調兒童

次韻答張天覺二首

車輕馬穩轡銜堅但有蚊蟲喜撲緣截斷口前君莫怪
人間差樂勝巢仙

馭風騎氣我何勞且要長松作土毛亦如訶佛丹霞老
却向清涼禮白毫

次韻黃魯直畫馬試院中作

少年鞍馬勤遠行卧聞鼙鼓風雨聲見此忽思短策橫
十年髀肉磨欲透那更陪君作詩瘦不如羊斟歸飯豆
門前欲嘶御史驄詔恩三日休老翁羨君懷中雙橘紅

黃有

老母

余與李廌方叔相知久矣領貢舉事而李不得
第愧甚作詩送之

與君相從非一日筆勢翩翩疑可識平時謾說古戰場
過眼終迷日五色我慙不出君大笑行止皆天子何責

青袍白紵五千人知子無怨亦無德買羊沽酒謝玉川
為我醉倒春風前歸家但草凌雲賦我相夫子非癯仙

和王晉卿送梅花次韻

東坡先生未歸時自種來禽與青李五年不踏江頭路
夢逐東風泛蘋芷江梅山杏為誰容獨笑依依臨野水
此間風物君未識花浪翻天雪相激明年我復在江湖
知君對花三嘆息

和宋肇遊西池次韻

漢皇慈儉不開邊
尚教千艘下瀨船
貪看櫂艫飛鬪艦
不知顛負舞鈞天
故山西望三千里
往事回思二十年
自笑區區足官府
不如公子散神仙

書父宣畫四首

竹鶴

此君何處不相宜
况有能言老令威
誰識長身古君子
猶將縑布綠深衣

黃精鹿

太華西南第幾峯
落花流水自重重
幽人只採黃精去
不見春山鹿養茸

杏花白鵲

天工翦刻為誰妍
抱蕊游蜂自作團
把酒惜春都是夢
不如閒客此閒看

蓮龜

半脫蓮房露壓欹
綠荷深處有游龜
只應翡翠蘭荂上
獨見玄夫曝日時

僕領貢舉未出錢穆父雪中作詩見及三月二十日同遊金明池始見其詩次韻為答

雪知我出已全消花待君來未敢飄行避門生時小飲
忽逢騎吏有嘉招魚龍絕技來千里斑白遺民數四朝
知有黃公酒壚在蒼顏華髮自相遥

次韻子由五月一日同轉對

跪奉新書笏在腰談王正欲伴耕樵晉陽宜為一門事

高祖謂溫大雅兄弟云我
起義晉陽止為卿一門耳

宣政聊同五月朝

正元中詔
自今後五

月一日御宣政殿
與文武百僚相見

憂患半生聯出處歸休上策早招要

後生可畏吾衰矣刀筆從來錯料堯

韓康公挽詞三首

故國非喬木興王有世臣嗟予後死者猶及老成人德
業經文武風流表縉紳空餘行樂地處處泣遺民

再世忠清德三朝翼贊勲功成不歸國就訪敢忘君舊
學嚴詩律餘威靖塞氛何當繼韓奕故吏總能文

西第開東閣初筵點後塵笙歌邀白髮燈火樂青春扶

路三更罷回頭一夢新賦詩猶墨濕把卷獨沾巾

栢石圖詩

并叙

陳公弼家藏栢石圖其子慥季常傳寶之東坡居士作詩以為之銘

栢生兩石間天命本如此雖云生之艱與石相終始韓子俯仰人但愛平地美土膏雜糞壤成壞幾何耳君看化槎牙豈有可移理蒼龍轉玉骨黑虎抱金柅畫師亦可人使我毛髮起當年落筆意正欲譏韓子

慶源宣義王丈以累舉得官為洪雅主簿雅州
戶掾遇吏民如家人安樂之既謝事居眉
之青神瑞草橋放懷自得有書來求紅帶既
以遺之且作詩為戲請黃魯直學士秦少游
賢良各為賦一首為老人光華

青衫半作霜葉枯遇民如兒吏如奴吏民莫作官長看
我是識字耕田夫妻啼兒號刺史怒時有野人來挽鬚
拂衣自注下下考芋魁飯豆吾豈無歸來瑞草橋邊路

獨游還佩平生壺慈母巖前自喚渡布衣江上人爭扶
今年蠶市數州集中有遺民懷袴襦邑中之黔相指似
白髯紅帶老不癯我欲西歸卜隣舍隔牆拊掌容歌呼
不學山王乘駟馬回頭空指黃公壚

次許冲元韻送成都高士敦鈐轄

移中老監本虛名懶作燕山萬里行

余與高君奉使契丹辭免不行坐

看飛鴻迎使節歸來駿馬換傾城高才本不緣勲閥餘
力還思治蜀兵西望雪山烽火盡不妨樽酒寄平生

次前韻送程六表弟

君家兄弟真連壁，門下朱輪家萬石。竹使猶分刺史符，
尚方行賜尚書舄。前年持節發倉廩，到處賣刀收鹽粟。
歸來閉口不論功，却走渡江誰復惜。君才不用如澗松，
我老得全猶社櫟。青衫莫厭百僚底，白首上有千薪積。
憶昔江湖一釣舟，無數雲山供點筆。未應便障西風扇，
只恐先移北山檄。憑君寄謝江南叟，念我空見長安日。
浮江沂蜀有成言，江水在此吾不食。

和王晉卿題李伯時畫馬

督郵有良馬不為君所奇
顧收紙上影駿骨何由歸
一朝見縈策蟻封驚肉飛
宜惟馬不遇人已半生癡

送錢穆父出守越州絕句二首

簿書常苦百憂集樽酒今應一笑開
京兆從教思廣漢會稽聊喜得方回

若耶溪水雲門寺
賀監荷花空自開
我恨今猶在泥滓
勸君莫棹酒船回

戲書李伯時畫御馬好頭赤

山西戰馬饑無肉
夜嚼長秸如嚼竹
蹄間三丈是徐行
不信天山有坑谷
豈如廐馬好頭赤
立仗歸來卧斜日
莫教優孟卜
莖地厚衣薪
樵入銅歷

送程七表弟知泗州

江湖不在眼
塵土坐滿顏
繫舟清洛尾
初見淮南山
淮山相媚好
曉鏡開煙鬟
持此娛使君
一笑簿領間
使君如天馬
朝燕暮荆蠻
時無王良手
空老十二閑
聊當出毫

末化服校與頑勿謂無人知古佛臨濤灣赤子視萬類
流萍閱人寰但使此可人餘事真茆菅

送曹輔赴閩漕

曹子本儒俠筆勢翻濤瀾往來戎馬間邊風裂儒冠詩
成橫槩裏楮墨何曾乾一旦事遠遊紅塵隔巖灘平生
羊炙口並海搜鹹酸一從荔枝飲豈念苜蓿樂我亦江
海入市朝非所安常恐青霞志坐隨白髮闌淵明賦歸去
談笑便解官今我何為者索身良獨難憑君問清淮秋

水今幾竿我舟何時發霜露日已寒

次韻王郎子立風雨有感

百年一俯仰寒暑相主客稍增裘褐氣已覺團扇厄不
須計榮辱此喪彼有獲我琴終不敗無攫故無驛後生
不自牧呻吟空挾策握苗不待長賣菜苦求益此郎獨
靜退門外無行迹但恐陶淵明每為饑所迫淒風弄衣
結小雪穿門席願君付一笑造物亦戲劇朝來賦雲夢
筆落風雨疾為君裁春衫高會開桂籍

次韻黃魯直嘲小德小德魯直子其母微故其
詩云解著潛夫論不妨無外家

進饌客爭起小兒那可涯莫欺東方星三五自橫斜
名駒已汗血老蚌空泥沙但使伯仁長還興絡秀家

書林次中所得李伯時歸去來陽關二圖後二
首

不見何戡唱渭城舊人空數米嘉榮龍眠獨識慙懃處
畫出陽關意外聲

兩本新圖寶墨香樽前獨唱小秦王為君翻作歸來引
不學陽關空斷腸

送蹇道士歸廬山

物之有知蓋恃息孰居無事使出入心無天遊室不空
六鑿相攘婦爭席法師逃人入廬山山中無人自往還
往者一空還者失此身正在無還間絲絲不絕微風裏
內外丹成一彈指人間俯仰三千秋騎鶴歸來與子遊
卧病逾月請郡不許復直玉堂十一月一日鐫

院是日苦寒詔賜官燭法酒書呈同院

微霰疎疎點玉堂
詞頭夜下攬衣忙
分光御燭星辰爛
拜賜官壺雨露香
醉眼有花書字大
老人無睡漏聲長
何時却逐桑榆暖
社酒寒燈樂未央

送周朝議守漢州

茶為西南病岷俗記二李

杞與稷也

何人折其鋒矯矯六君

子

思道與姪正孺張永徽吳醇翁呂元鈞宋文輔也

君家尤出力流落初坐此

謂當收桑榆華髮看劒履胡為犯風雪歲晚行未已念

歸誠得計顧自為謀耳吾聞江漢間瘡痍有未起莫輕
龔遂老君王付尺箠召還當有詔挽袖謝隣里猶堪作
水衡供帳園林美

木山

并叙

吾先君子嘗蓄木山三峯且為之記與詩詩人梅二丈
聖俞見而賦之今三十年矣而猶子千乘又得五峯益
竒因次聖俞韻使并刻之其側

聖俞詩

空山枯楠大殺牛霹靂夜落魚鳧洲魚鳧水射幾千秋
蠹肌爛髓沙蕩流惟存堅骨蛟龍鏤形倖三山中雄酋
左右兩峯相挾翼尊奉君長無慢尤蘇夫子見之驚且
喜買於谿叟憑貂裘因嗟大不為梁棟又歎殘不為薪
樵雨侵蘚澀得石瘦宜與夫子歸隱丘

次韻

木生不願回萬牛願終天年仆沙洲時來幸逢河伯秋
掀然見怪推不流蓬婆雪領巧雕鏤蟄蟲行蟻為豪酋

阿咸大膽忽持去河伯好事不汝尤城中古沼浸坤軸
一林瘦竹吾菟裘二頃良田不難買三年檉木行可植
會將白髮對蒼巘魯人不厭東家丘

送千乘千能兩姪還鄉

治生不求富讀書不求官譬如飲不醉陶然有餘歡君
看龐德公白首終泥蟠豈無子孫念顧獨遺以安鹿門
上冢回牀下拜龍鸞躬耕竟不起耆舊節獨完念汝少
多難冰雪落綺紉五子如一人奉養真色難烹難獨餽

母自饗苜蓿槃口腹恐累人寧我食無肝西來四千里
敝袍不言寒秀眉似我兄亦復心閒寬忽然捨我去歲
晚留餘酸我豈軒冕人青雲意先闌汝歸蒔松菊環以
青琅玕橙陰三年成可以挂我冠清江入城郭小圃生
微瀾相從結茆舍曝背談金鑒

送周正孺知東川

得郡書生榮還家昔人重而况東西川千騎許上冢里
門下車入父老自驚聳端如何武賢不事長卿寵清時

養材傑杞梓方培植未應遺合抱取用及把拱如君尚
出麾顧我宜耕壟告歸謝先手求去悔不勇宣云慕廉
退實自知衰冗為君掃棠陰畫像或相踵

蜀中太守無
不畫像者

題李伯時畫趙景仁琴鶴圖二首

清獻先生無一錢故應琴鶴是家傳誰知默鼓無絃曲
時向珠宮舞幻仙

醜石寒松未易親聊將短曲調長人乘軒故自非明眼
終日傲傲舞爨薪

次前韻再送周正孺

東川得望郎坐與西爭重高風傾石室舊學鄙文冢蜀
人安使君所至野不聳竹馬迎細侯大錢送劉寵遙知
句谿路老穉相扶擁看畫古叢祠百怪朝幽拱牛頭與
堯率雲木蔚堆壠醉鄉追舊游筆陣賈餘勇聊將詩酒

樂一掃簿書冗西風吹好句珠玉本無踵

劉琬文冢
銘在梓州

書王定國所藏煙江疊嶂圖

王晉卿畫

江上愁心千疊山浮空積翠如雲煙山耶雲耶遠莫知

煙空雲散山依然但見兩崖蒼蒼暗絕谷中有百道飛
來泉縈林絡石隱復見下赴谷口為奔川川平山開林
麓斷小橋野店依山前行人稍度喬木外漁舟一葉江
吞天使君何從得此本點綴毫末分清妍不知人間何
處有此境徑欲往置二頃田君不見武昌樊口幽絕處
東坡先生留五年春風搖江天漠漠暮雲卷雨山娟娟
丹楓翻鴉伴水宿長松落雪驚醉眼桃花流水在人世
武陵豈必皆神仙江上清空我塵土雖有去路尋無緣

還君此畫三歎息山中故人應有招我歸來篇

次韻王定國會飲清虛堂

何遜揚州又幾年官梅詩興故依然何人可復問季孟
與子不妨中聖賢卜築君方淮上郡歸心我已劔南川
此身正似蠶將老更盡春光一再眠

興龍節侍宴前一日微雪與子由同訪王定國

小飲清虛堂定國出數詩皆佳而五言尤奇

子由又言昔與孫巨源同過定國感念存沒

悲歎久之夜歸稍醒各賦一篇明日朝中以
示定國也

天風淅淅飛玉沙詔恩裏沐休早衙遙知清虛堂裏雪
正似薝蔔林中花出門自笑無所詣呼酒持勸惟君家
踏冰凌兢戰疲馬扣門剝啄驚寒鴉羨君五字入詩律
欲與六出爭天葩頭風已倩檄手愈背癢恰得仙爪爬
銀鉗瀉油浮蟻酒紫盃鋪粟盤龍茶幅巾起作鸚鵡舞
疊鼓誰摻漁陽槌九衢燈火雜夢寐十年聚散空咨嗟

明朝握手殿門外共看銀闕瞰晨霞

王晉卿所藏著色山二首

縹緲營丘水墨仙浮空出沒有無間爾來一變風流盡
誰見將軍著色山

犖确何人似退之意行無路欲從誰宿雲解駁晨光漏
獨見山紅澗碧時

次韻黃魯直效進士作歲寒知松栢詩

龍蟄雖高卧雞鳴不廢時炎涼徒自變茂悅兩相知已

負棟梁質肯為兒女姿那憂霜貿貿未喜日遲遲難與
夏蟲語永無秋實悲誰知此植物亦解秉天彝

王晉卿作煙江疊嶂圖僕賦詩十四韻晉卿和
之語特奇麗因復次韻不獨紀其詩畫之美
亦為道其出處契闊之故而終之以不忘在
莒之戒亦朋友忠愛之義也

山中舉頭望日邊長安不見空雲煙歸來長安望山上
時移事改應潛然管絃去盡賓客散惟有馬埒編金泉

渥洼故自千里足要飽風雪輕山川屈居華屋啗棗脯
十年俯仰龍旗前却因病瘦出奇骨鹽車之厄寧非天
風流文采磨不盡水墨自與詩爭妍畫山何必山中
人田歌自古非知田鄭虔三絕君有二筆勢挽回三
百年欲將巖谷亂窈窕眉峯脩嫵誇連娟人間何有
春一夢此身將老蠶三眠山中幽絕不可久要作平
地家居仙能令水石長在眼非君好我當誰緣願
君終不忘在莒樂時更賦囚山篇

柳子厚有
囚山賦

夜直玉堂攜李之儀端叔詩百餘首讀至夜半

書其後

玉堂清冷不成眠伴直難呼孟浩然暫借好詩消永夜
每逢佳處輒參禪愁侵硯滴初含凍喜入燈花欲鬪妍
寄語君家小兒子他時此句一時編

景仁和賜酒燭詩復次韻謝之

時公方進新樂

笙磬分均上下堂

舊說堂上之樂皆受笙均堂下之樂皆受磬均

游魚舞獸自

奔忙朱絃初識孤桐韻

舊樂金石聲高而絃聲微今樂金石與絃聲皆著

玉琯

猶聞拒黍香

舊法以尺生律今以黍定律以律生尺

萬事今方客伯始一

班我亦愧真長此生會見三雍就無復寥寥歎未央

次韻劉貢父春日賜懽勝

寬詔隨春出內朝三軍喜氣挾孤貂鏤銀錯落翻斜月

剪綵繽紛舞慶霄臘雪強飛纔到地

前一日微雪

曉風偷轉

不驚條脫冠徑醉應歸卧便腹從人笑老韶

是日幕次賜酒

再和

與君流落偶還朝過眼紛綸七葉貂莫笑華顛飄彩勝

幾人黃壤隔青霄行吟未許窮騷雅坐嘯猶能出教條
記取明年江上郡五更春枕夢春韶

葉公秉王仲至見和次韻荅之

衿絺方暑亦堪朝歲晚淒風憶阜貂共喜鵲鸞歸禁籞
心知日月在重霄君如老驥初遭絡我似枯桑不受條
強鑷霜鬚簪彩勝蒼顏得酒尚能韶

再和

衰遲何幸得同朝溫勁如君合珥貂誰惜異材蒙徑寸

自慙枯朽借凌霄光風泛泛初浮水紅糝離離欲綴條
後日一樽何處共奉常端冕作咸韶

次韻王晉卿惠花栽栽所寓張退傅第中一首
坐來念念失前人共向空中寓一塵若問此花誰是主
天教閒客管青春

次韻王晉卿上元侍燕端門

月上九門開星河繞露臺君方枕中夢我亦化人來
光動仙球絕香餘步輦回相從穿萬馬衰病若為陪

王鄭州挽詞

克臣

美君華髮起琳宮，右輔初還鼓角雄。
千里農桑歌子產，一時冠蓋慕蕭嵩。
那知聚散春糧外，便有悲歡過隙中。
京兆同僚幾人在，猶思對案筆生風。

予為開封幕
與子難同廳

書王定國所藏王晉卿畫著色山二首

白髮四老人，何曾在商顏。
煩君紙上影，照我胸中山。
山中亦何有，木老土石頑。
正賴天日光，潤谷紛爛斑。
我心空無物，斯文定何間。
君看古井水，萬象自往還。

君歸嶺北初逢雪我亦江南五見春
寄語風流王武子
三人俱是識山人

送呂昌朝知嘉州

不羨三刀夢蜀都聊將八詠繼東吳
卧看古佛凌雲閣
勅賜詩人明月湖得句會應緣竹鶴
思歸寧復為尊鱸
橫空好在脩眉色頭白猶堪乞左符

次韻黃魯直寄題郭明父府推潁州西齋二首

樹頭啄木常疑客客去而瞋定不然
脫轄已應生井沫

解衣聊復起庖煙平生詩酒真相汙此去文書恐獨賢
早晚西湖映華髮小舟翻動水中天

寂寞東京月旦州德星無復綴珠旒莫嗟平輿空神物
尚有西齋接勝流春夢屢尋湖十頃家書新報橘千頭
雪堂亦有思歸曲為謝平生馬少游

輿音預

東坡全集卷十七

欽定四庫全書

東坡全集卷十八

宋 蘇軾 撰

詩一百一十八首

次韻秦少章和錢蒙仲

碧畦黃隴稻如京
歲美人和易得情
鑑裏移舟天外思
地中鳴角古來聲
山圍故國城空在
潮打西陵意未平
二子有如雙白鷺
隔江相照雪衣明

次韻錢越州

髯尹超然定逸羣南遊端為訪雲門謫仙歸侍玉皇案
老鶴來乘刺史轡已覺簿書哀老子故知籩豆有司存
年來齒頰生荆棘習氣因君又一言

同秦仲二子雨中游寶山

平明已報百吏散半日來陪二子閒立鵲低昂煙雨裏
行人出沒樹林間

去杭十五年復游西湖用歐陽察判韻

我識南屏金鯽魚重來拊檻散齋餘還從舊社得心印

似省前生覓手書
封合平湖久蕪漫
人經豐歲尚凋疎
誰憐寂寞高常侍
老去狂歌憶孟諸

與莫同年雨中飲湖上

到處相逢是偶然
夢中相對各華顛
還來一醉西湖雨
不見跳珠十五年

送子由使契丹

雲海相望寄此身
那因遠適更沾巾
不辭驛騎凌風雪
要使天驕識鳳麟
沙漠回看清禁月
湖山應夢武林春

單于若問君家世莫道中朝第一人

次韻荅劉景文左藏

我老詩壇仆鼓旗借君佳句發良時但空賀監杯中物
莫示孫郎帳下兒夜燭催詩金燼落秋芳壓帽露華滋
故應好語如爬癢有味難名只自知

座上復借韻送寄嵐軍通判葉朝奉

雲間踏白看纓旗莫忘西湖把酒時夢裏吳山連越嶠
樽前羌婦雜胡兒夕烽過後人初醉春鴈來時雪未滋

為問從軍真樂否書來粗遣故人知

軾始於文登海上得白石數升如芡實可作枕

聞梅丈嗜石故以遺其子子明學士子明有

詩次其韻

海隅荒怪有誰珍零落珊瑚泣季倫法供坐令微物重

軾舊有怪石供

色難歸致孝心純只疑薏苡來交趾未信蠙珠

出泗濱願子聚為江夏枕不勞麾扇自寧親

次韻錢越州見寄

莫將牛弩射羊羣卧治何妨晝掩門
稍喜使君無疾病
時因送客見車轡搔頭白髮秋無數
閉眼丹田夜自存
欲息波瀾須引去吾儕豈獨坐多言

文登蓬萊閣下石壁千丈為海浪所戰時有碎
裂淘灑歲久皆圜熟可愛土人謂此彈子渦
也取數百枚以養石菖蒲且作詩遺垂慈堂
老人

蓬萊海上峯玉立色不改孤根捍滔天雲骨有破碎陽

侯殺廉角陰火發光采纍纍彈丸間瑣細成珠琲閭浮
一漚耳真妄果安在我持此石歸袖中有東海垂慈老
人眼俯仰了大塊置之盆盎中日與山海對明年菖蒲
根連絡不可解儻有蟠桃生旦暮猶可待

次韻毛滂法曹感雨詩

江南佳公子遺我錦繡端攬之溫如春公子焉得寒興
雨自有時膚寸便濛濛歛藏以自潤牛斗何足干空庭
月與影強結三友歡我豈不足歟要此清團團所歡在

一醉常恐樽中乾捨酒尚可樂明珠如彈丸但恐千仞
雀忽忽發虛彈迨子閒暇時種子田中丹一朝涉世故
空腹容欺謾我頃在東坡秋菊為夕餐永愧坡間人布
褐為我完雪堂初覆瓦上簞無下莞時時亦設客每醉
筒輒彈一笑便傾倒五年得輕安公子豈我徒衣鉢傳
一簞定非郊與島筆勢江河寬悲吟古寺中穿帷雪漫
漫他年記此味芋火對懶殘

送鄧宗古還鄉

廣漢有姜子孝弟行里閭赤眉雖豺虎弛兵過其墟至
今空清泉無復雙鯉魚南鄭有李邵得妙甘公書夜生
指流星驚倒兩使車抱關不肯仕布褐蒙璠璣西南固
多士君得二子餘凜凜忠文公搜士及樵漁澗谿有幽
討蘋芷真嘉蔬歲晚終不食心惻當何如

參寥上人初得智果院會者十六人分韻賦詩

軾得心字

漲水返舊壑飛雲思故岑念君忘家客亦有懷歸心三

間得幽寂數步藏清深攢金盧橘塢散火楊梅林茶筍
盡禪味松杉真法音雲崖有淺井玉醴常半尋遂名參
寥泉可濯幽人襟相攜橫嶺上未覺衰年侵一眼吞江
湖萬象涵古今願君更小築歲晚解我簪

哭王子立次兒子迨韻三首

彭城初識子照眼白而長異夢成先兆

子為密州子立未嘗相識忽告

同舍生曰吾夢為密州婿何也已而果以子由之子妻之清言得未嘗豈惟知禮意

遂欲補詩亡

子立能詩而有禮學

咄咄真相逼諸生敢鴈行

非無伯鸞志獨有子雲悲恨子非天合猶能使我思兒

曹莫淒慟老眼欲枯妾會哭皆豪傑誰為感舊詩

子立與黃

魯直張文潛晁無咎秦少游陳無已皆友善

龍困嘗魚服羊環或虎蒙忽忽成鬼錄憤憤到天公偶
落藩牆上同游羿穀中回看十年事黃葉卷秋風

異鵲 并叙

熙寧中柯侯仲常通守漳州以救饑得民有二鵲栖其
廳事訖侯之去鵲亦送之漳人異焉為賦此詩

昔我先君子仁孝行於家家有五畝園么鳳集桐花是
時烏與鵲巢穀可俯拏憶我與諸兒飼食觀羣呀里人
驚瑞異野老笑而嗟云此方乳哺甚畏鳶與蛇手足之
所及二物不敢加主人若可信衆鳥不我遐故知中孚
化可及魚與黿柯侯古循吏惆悵真無華臨漳所全活
數等江干沙仁心格異族兩鵲栖其衙但恨不能言相
對空楂楂善惡以類應古語良非夸君看彼酷吏所至
號鬼車

次韻詹適宣德小飲巽亭

君方夢謫仙

來詩記李白
即官湖事

我亦弔文園江上同三黜天涯

又一樽濤雷殷白晝梅雪耿黃昏歸去多情雨應隨御

史軒

詹為御
史主簿

東川清絲寄魯冀州戲贈

鵝溪清絲清如冰上有千歲交枝藤藤生谷底飽風雪

歲晚忽作龍蛇升嗟我雖為老侍從骨寒只愛布與繒

牀頭錦衾未還客坐覺芒刺在背膺豈如髯卿晚乃貴

福祿正似川方增醉中倒着紫綺裘下有半臂出縹綾
封題不敢妄裁剪刀尺自有佳人能遙知千騎出清曉
積雪未放游塵興白鬚紅帶柳絲下老弱空巷人相登
但放奇紋出領袖吾髯雖老無人憎

怡然以垂雲新茶見餉報以大龍團仍戲作小
詩

妙供來香積珍烹具大官揀芽分雀舌賜茗出龍團曉
日雲庵暖春風浴殿寒聊將試道眼莫作兩般看

次韻王忠玉遊虎丘絕句三首

當年大白此相浮老守娛賓得二丘

郡人有閻丘公太守王規父嘗云不

謁虎丘即謁閻丘規父忠玉伯父也

白髮重來故人盡空餘叢桂小山幽

青蓋紅旗映玉山新詩小草落玄泉風流使者人爭看

知有真娘立道邊

虎丘中路有真娘墓

舞衣歌扇轉頭空只有青山香靄中莫共吳王鬪百草
使君未敢借驚鴻

寄蔡子華

故人送我東來時手栽荔子待我歸荔子已丹吾髮白
猶作江南未歸客江南春盡水如天腸斷西湖春水船
想見青衣江畔路白魚紫筍不論錢霜髯三老如霜檣
舊交零落今誰在莫從唐舉問封侯但遣麻姑更爬背

和錢四寄其弟蘇

再見濤頭湧玉輪煩君久駐浙江春年來總作維摩病
堪笑東西二老人

卧病彌月聞垂雲花開順閣黎以詩見招次韻答之

道人心似水不礙照花妍
燕坐春強半清陰月屢遷
平生無起滅一念有陳鮮
嫋嫋風枝舉離離日萼薦
病吟終少味老醉不成顛
何必遨頭出湖中有散仙

故周茂叔先生濂谿

谿在廬山下

世俗眩名實至人疑有無
怒移水中蟹愛及屋上烏
坐令此溪水名與先生俱
先生本全德廉退乃一隅
因拋彭澤米偶似西山夫
遂即世所知以為溪之呼
先生豈我輩造物乃其徒
應同柳州柳聊使愚溪愚

次韻子由使契丹至涿州見寄四首

老人癡鈍已逃寒子復辭行理亦難要到盧龍看古塞

投文易水弔燕丹

余昔年辭免使北

胡羊代馬得安眠窮髮之南共一天又見子卿持漢節

遙知遺老泣山前

羶毳年來亦甚都時時鳩舌問三蘇

予與子由入京時北使已問所在後

余館伴北使屢誦三蘇文

那知老病渾無用欲問君王乞鏡湖

始憶庚寅降屈原旋看蠟鳳戲僧虔隨翁萬里心如鐵

此子何勞為買田

時猶子
遲待行

雪後便欲與同僚尋春一病彌月雜花都盡獨
牡丹在耳劉景文左藏和順闌黎詩見贈次
韻荅之

殘花怨久病剩雨泣餘妍不見雙旌出空令九陌遷

開園

時市井
皆入

知君苦寂寞妙語嚼芳鮮淺紫從爭發深紅任早

薦天葩尚青萼國色待華顛載酒邀詩將臞儒不是仙

次韻劉景文周次元寒食同游西湖

絮飛春減不成年老境同乘下瀨船藍尾忽驚新火後

樂天寒食詩云三盃藍尾酒一搤膠牙餠邀頭要及浣花前成都太守自正月二日出遊謂之遨

頭至四月十九日浣花乃止山西老將詩無敵洛下書生語更妍共向

北山尋二士畫橈鼉鼓聒清眠

連日與忠玉張全翁游西湖訪北山清順道潛

二詩僧登垂雲亭飲參寥泉最後過唐州陳

使君夜飲忠玉有詩次韻荅之

北山非自高千仞付我足西湖亦何有萬象生我目雲

深人在塢風靜響應谷與君皆無心信步行看竹竹間
逢詩鳴眼色奪湖淥百篇成俯仰二老相追逐故應千
頃池養此一雙鵠山高路已斷亭小膝屢促夜尋三尺
井渴飲半甌玉明朝開絲管寒食雜歌哭使君坐無聊
狂客來不速載酒有鷗夷扣門非啄木浮蛆灑金盃翠
羽出華屋須臾便陳迹覺夢那可續及君未渡江過我
勤秉燭一笑換人爵百年終鬼錄

新茶送僉判程朝奉以餽其母有詩相謝次韻

答之

縫衣付與漂陽尉捨肉懷歸潁谷封聞道平反供一笑
會須難老待千鍾火前試焙分新胯雪裏頭綱輟賜龍
從此升堂是兄弟一甌林下記相逢

次韻送張山人歸彭城

羨君飄蕩一虛舟來作錢塘十日遊水洗禪心都眼淨
山供詩筆總眉愁雪中乘興真聊爾春盡思歸却罷休
何日五湖從范蠡種魚萬尾摘千頭

次韻林子中王彥祖唱酬

早知身寄一漚中晚節尤驚落木風

近聞莘老公擇皆逝故有此句昨

夢已論三世事歲寒猶喜五人同

軾與子中彥祖子敦完夫同試舉人景德

寺今皆健

雨餘北固山圍座春盡西湖水映空差勝四明狂

監在更將老眼犯塵紅

壽星院寒碧軒

清風蕭蕭搖窓扉窓前修竹一尺圍紛紛蒼雪落夏簟

冉冉綠霧霑人衣日高山蟬抱葉響人靜翠羽穿林飛

道人絕粒對寒碧為問鶴骨何緣肥

書劉景文所藏王子敬帖絕句

家雞野鷺同登俎春蚓秋蛇總入奩君家兩行十二字
氣壓鄴侯三萬籤

書劉景文所藏宗少文一筆畫

宛轉回紋錦縈盈連理花何須郭忠恕匹素畫縑車

真覺院有洛花花時不暇往四月十八日與劉

景文同往賞枇杷

綠暗初迎夏紅殘不及春
魏花非老伴盧橘是鄉人
井落依山盡巖崖發興新
歲寒君記取松雪看蒼鱗

又和劉景文韻

牡丹松檜一時栽付與春風自在開
試問壁間題字客幾人不為看花來

西湖壽星院此君軒

卧聽謾謾碎龍鱗
俯看蒼蒼立玉身
一舸鴟夷江海去
尚餘君子六千人

仲天貺王元直自眉山來見余錢塘留半歲既
行作絕句五首送之

仲君豈弟多學王子清修寡言病後空驚鶴瘦時來或
作鵬騫

海角煩君遠訪江源與我同來剩作數詩相送莫教萬
里空回

三人一旦同行

二子與秦少章同寓高齋復同舟北行

留下高齋月明遙

想扁舟京口尚餘孤枕潮聲

更欲留君久住念君去國彌年空使犀顱玉頰長懷髯
舅悽然

為予遠致慙懃瑞草橋邊老人紅帶雅宜華髮白醪光

泛新春

老人王慶源也

贈善相程傑

心傳異學不謀身自要清時閱搢紳
火色上騰雖有數
急流勇退豈無人書中苦覓元非訣
醉裏微言却近真
我似樂天君記取華顛賞遍洛陽春

次韻林子中諒山亭見寄

竒逸多聞老敬通
何人慷慨解憐翁
十年簿領催衰白
一笑江山發醉紅
聞道賦詩臨北固
未應舉扇向西風
叩頭莫喚無家客
歸掃岷峩一畝宮

再和并荅楊次公

毘盧海上妙高峯
二老遙知說此翁
聊復艤舟尋紫翠
不妨持節散陳紅
高懷却有雲門興
好句真傳雪竇風
唱我三人無譜曲
馮夷亦合舞幽宮

次韻劉景文送錢蒙仲三首

誰識天閑老驥不爭日暮長途送盡青雲九子歸去扁舟五湖

寄語竹林社友同書桂籍天倫王郎獨為鬼錄世間無此玉人

五字古原春草千金漢殿長門經緯尚餘三策典刑留與諸孫

菩提寺南漪堂杜鵑花

南漪杜鵑天下無披香殿上紅氍毹鶴林兵火真一夢
不歸閨苑歸西湖

題楊次公春蘭

春蘭如美人不採羞自獻時聞風露香蓬艾深不見丹
青寫真色欲補離騷傳對之如靈均冠佩不敢燕

題楊次公蕙

蕙本蘭之族依然臭味同曾為水仙佩相識楚詞中幻
色雖非實真香亦竟空云何起微馥鼻觀已先通

次韻曹輔寄壑源試焙新芽

仙山靈雨濕行雲洗遍香肌粉未勻明日來投玉川子
清風吹破武林春要知玉雪心腸好不是膏油首面新
戲作小詩君一笑從來佳茗似佳人

次韻袁公濟謝芎椒詩

燥吻時時著酒濡要令卧疾致文殊河魚潰腹空號楚
汗水流駁始信吳

吳真君服椒法云
半年脚心汗如水

自笑方求三歲艾

不如長作獨眠夫羨君清瘦真仙骨更助飄飄鶴背軀

次韻和楊次公惠徑山龍井水

龍井水洗病眼有效

漏盡雞號厭夜行年來小器溢餅罌棄官縱未歸東海
罷郡猶堪作水衡幻色將空眼先暗勝游無礙脚殊輕
空煩遠致龍淵水寧復臨池似伯英

次韻劉景文登介亭

澤國梅雨餘衰年困蒸溽高堂磨新塼頗覺利晉足松
根百尺井兩綆飛淨淥流觴聚兒童一笑為捧腹清風
信可御剛氣在巖麓始知共此世物外無三伏長歌入

雲去不待絃管逐西湖真西子煙樹點睂目濤江少醞
藉高浪翻雪屋俛仰拊四海百世飛鳥速速追錢氏餘
近弔祖侯躅吾生如寄耳寸晷輕尺玉誰似劉將軍逸韻
謝邊幅千言一揮手五車不再讀春巖彩雞舞月峽哀
猿哭朝先鷓鴣起莫與寒蛩續我老廢吟哦賴君時擊
觸從今事遠覽發軔此幽谷清游得三昧至樂謝五欲
莫作狂道士氣壓劉師服

袁公濟和劉景文登介亭詩復次韻答之

昏昏墮醉夢奈此六月溽君詩如清風吹我朝睡足登
臨得佳句江白照湖綠袖手獨不言默藁已在腹是時
風雨過藹藹雲歸麓疎星帶微月金火爭見伏惜哉此
清景變滅不可逐歸來讀君詩耿耿猶在目却思少年
日聲價爭場屋文如翻水成賦作叉手速秋風起鴻鴈
我亦繼華躅那知君蹭蹬獨泣荆山玉相見南新道青
衫垂破幅早知事大繆恨不十年讀莫嫌馮唐老終勝
賈誼哭今年復為僚舊好許重續升沈何足道等是蠻

與觸共為湖山主出入窮澗谷衆馳君不爭人棄我所
欲何時神武門相約挂冠服

介亭餞楊傑次公

籃輿西出登山門嘉與我友尋仙村丹青明滅風篁嶺

環珮空響桃花源

郡人謂介亭山下為桃花源路

前朝欲上已蠟屐黑

雲白雨如傾盆今晨積霧卷千里豈畏觸熱生病根在
家頭阨無為子久與青山為弟昆孤峯盡處亦何有西
湖鏡天江抹坤臨高麾手謝好住清風萬壑傳其言風

回響荅君聽取我亦到處隨君軒

次京師韻送表弟程懿叔赴夔州運判

與子甥舅氏摧頽各蒼顏並為東諸侯長此佳江山寒
松無時花安得挿髻鬟惟將老不死一笑榮枯間我甚
似樂天但無素與蠻挂冠及耄當獲一紀閒子亦拙
進取才高命堅頑譬如萬斛舟行此九折灣仲氏新得
道一漚自塵寰

君之兄德孺自言
近於佛法有得

歲晚家鄉路莫遣生

榛菅

葉教授和溥字韻詩復次韻為戲記龍井之游
先生魯諸儒飲食清不溥空腸出秀句吟嚼五味足華
堂開絲管眸子漲春綠先生疾走避面冷毒在腹歸來
煮瓠葉弟子歌早麓聲淫及靈臺中有鹿鹿伏功名一
走兔何用千人逐故應容我輩清座時閉目高亭石排
衙木杪挂飛屋我來無時節客亦不待速似聞雪髯叟
西嶺訪遺躅朝陽入潭洞金碧涵水玉泉扉夜不扃雲
袂本無幅慈皇付寶偈神侶得幽讀訥庵有老人宴坐

天魔哭時來獻纓絡法供燈相續吾儕詩酒汗欲往無
乃觸齋厨費晨炊車騎滿山谷願聞第一義鉢飯非所
欲便投切雲冠予幼好奇服

次韻林子中見寄

飄零洛社數遺民詩酒當年困惡賓元亮本無適俗韻
孝章要是有名人蒜山小隱雖為客江水西來亦帶岷
卷却西湖千頃葑笑看魚尾更莘莘

安州老人食蜜歌

贈僧仲殊

安州老人心似鐵老人心肝小兒舌不食五穀惟食蜜
笑指蜜蜂作檀越蜜中有詩人不知千花百草爭含姿
老人咀嚼時一吐還引世間癡小兒小兒得詩如得蜜
蜜中有藥治百疾正當狂走捉風時一笑看詩百憂失
東坡先生取人廉幾人相歡幾人嫌恰似飲茶甘苦雜
不如食蜜中邊甜

佛云吾言譬如
食蜜中邊皆甜

因君寄與雙龍餅鏡

空一照雙龍影三吳六月水如湯老人心似雙龍井

次韻錢穆父紫薇花二首

虛白堂前合抱花秋風落日照橫斜閱人此地知多少

物化無涯生有涯

虛白堂前紫薇兩株俗云樂天所種

折得芳蕤兩眼花題詩相報字傾斜篋中尚有絲綸句

坐覺天光照海涯

樂天詩云絲綸閣下文章靜鐘鼓樓中刻漏長獨坐黃昏誰是伴紫薇花

對紫薇郎上嘗書此詩以賜軾

送張嘉州

少年不願萬戶侯亦不願識韓荊州頗願身為漢嘉守
載酒時作凌雲遊虛名無用今白首夢中却到龍泓口

浮雲軒冕何足言惟有江山難入手峨眉山月半輪秋
影入平羌江水流謫仙此語誰解道請君見月時登樓
笑談萬事真何有一時付與東巖酒

佛峽人家白
酒舊有名

歸來

還受一大錢好意莫違黃髮叟

次韻蘇伯固主簿重九

雲間朱袖拂雲和知是長松挂女蘿髻重不嫌黃菊滿
手香新喜綠橙搓墨翻衫袖吾方醉紙落雲煙子患多
只有黃雞與白髮玲瓏應識使君歌

送李陶通直赴清溪

忠文文正二大老

司馬溫公范蜀公君之師友

蘇李廣平三舍人

蘇子

容宋次道與先公才元熙寧中封還李定詞頭天下謂之三舍人

喜見通家賢子弟自

言得邑少風塵從來勢利關心薄此去溪山琢句新肯向西湖留數月錢塘初識小麒麟

次韻楊公濟奉議梅花十首

梅梢春色弄微和作意南枝翦刻多月黑林間逢繡袂
霸陵醉尉誤誰何

相逢月下是瑤臺
藉草清樽連夜開
明日酒醒應滿地
空令饑鶴啄莓苔

綠髮尋春湖畔回
萬松嶺上一枝開
而今縱老霜根在
得見劉郎又獨來

月地雲堦漫一樽
玉奴終不負東昏
臨春結綺荒荊棘
誰信幽香是返魂

日出冰湖散水花
野梅官柳漸欹斜
西郊欲就詩人飲
黃四娘東子美家

君知早落坐先開莫著新詩句句催
嶺北霜枝最多思
忍寒留待使君來

冰盤未薦含酸子雪嶺先看耐凍枝
應笑春風木芍藥
豐肌弱骨要人醫

寒雀喧喧凍不飛
遶林空啅未開枝
多情好與風流伴
不到雙燕語時

鮫綃翦碎玉簪輕
檀暈粧成雪月明
肯伴老人春一醉
懸知欲落更多情

縞裙練悅玉川家肝膽清新冷不邪穠李爭春猶辦此
更教踏雪看梅花

贈劉景文

荷盡已無擎雨蓋菊殘猶有傲霜枝一年好景君須記
最是橙黃橘綠時

謝闕景仁送紅梅栽二首

年年芳信負紅梅江畔垂垂又欲開珍重多情闕令尹
直和根撥送春來

為君栽向南堂下記取他年著子時酸醎不堪調衆口
使君風味好攢眉

辯才老師退居龍井不復出入軾往見之常出
至風篁嶺左右驚曰遠公復過虎溪矣辯才
笑曰杜子美不云乎與子成二老來往亦風
流因作亭嶺上名之曰過溪亦曰二老謹次
辯才韻賦詩一首

日月轉雙轂古今同一丘惟此鶴骨老凜然不知秋去

佳雨無礙人天爭挽留去如龍出山雷雨卷潭湫來如
珠還浦魚鼈爭駢頭此生暫寄寓常恐名實浮我比陶
令愧師為遠公優送我還過溪溪水當逆流聊使此山
人永記二老遊大千在掌握寧有離別憂

送程之邵僉判赴闕

夜光不自獻天驥良難知從來一狐腋或出五穀皮賢
哉江東守收此幕中奇無華豈易識既得不自隨留君
望此府助我憐其哀二年促膝語一旦長揖辭林深伏

猛在岸改潛珍移去此當安從失君徒自悲念君瑚璉
質當今臺閣宜去矣會有合豈常懷其私

寄題梅宣義園亭

仙人子真後還隱吳市門不惜十年力治此五畝園初
期橘為奴漸見桐有孫清池壓丘虎異石來湖黿敲門
無貴賤遂性各琴尊我本放浪人家寄西南坤敞廬雖
尚在小圃誰當樊羨君欲歸去奈此未報恩愛子幸僚
友久要疑弟昆明年過君西飲我空餅盆

熙寧中軾通守此郡除夜直都廳囚繫皆滿日
莫不得返舍因題一詩于壁今二十年矣衰
病之餘復忝郡寄再經除夜庭事蕭然三圍
皆空蓋同僚之力非拙朽所致因和前篇呈
公濟子侔二通守

前詩

除日當早歸官事乃見留執筆對之泣哀此繫中囚小
人營餽糧墮網不知羞我亦戀薄祿因循失歸休不須

論賢愚均是為食謀誰能暫縱遣悶默愧前修

今和

山川不改舊歲月逝肯留百年一俯仰五勝更王囚同
僚比岑范德業前人羞坐令老鈍守嘯諾獲少休却思
二十年出處非人謀齒髮付天公缺壞不可修

遊寶雲寺得唐彥猷為杭州日送客舟中手書

一絕句云山雨霏微不滿空畫船來往疾輕
鴻誰知獨卧朱簾裏一榻無塵四面風明日

送彥猷之子垓赴鄂州舟中遇微雨感歎前
事因和其韻作兩首送之且歸其書唐氏

二妙凋零筆法空忽驚雲海戲羣鴻清詩不敢私囊篋

人道黃門有父風

黃門衛
恒也

出處榮枯一笑空十年社燕與秋鴻誰知白首長河路
還卧當時送客風

送江公著知吉州

三吳行盡千山水猶道桐廬更清美豈惟濁世隱狂奴

時平亦出佳公子初冠惠文讀城旦晚入奉常陪劔履
方將華省起彈冠忽憶釣臺歸洗耳未應良木棄大匠
要使名駒試千里奉親官舍當有擇得郡江南差可喜
白粲連樯一萬艘紅粧執樂三千指簿書期會得餘閒
亦念人生行樂耳

二耳義不同
故得重用

聞錢道士與越守穆父飲酒送二壺

龍根為脯玉為漿下界寒醅亦漫嘗一紙鵝經逸少醉
他年鵬賦謫仙狂金丹自足留衰鬢苦淚何須點別腸

吳越舊邦遺澤在定應符竹付諸郎

次韻劉景文路分上元

華燈闕艱歲冷月掛空府三吳重時節九陌自歌舞云
從月幾望遂至一百五嘉辰可屈指樂事相繼武今宵
掃雲陣極目淨天宇嬉遊各忘歸闐咽頃未覩飛毬互
明滅激水相吞吐老去反兒童歸來尚饒鼓新年消暗
雪舊歲添絲縷何時九江城相對兩漁父

予舊欲卜居廬山景文近

買宅
江州

再和楊公濟梅花十絕

一枝風物便清和看盡千林未覺多
結習已空從著袂不須天女問云何

天教桃李作輿臺故遣寒梅第一開
憑仗幽人收艾納國香和雨入青苔

白髮思家萬里回小軒臨水為花開
故應剩作詩千首知是多情得得來

人去殘英滿酒樽不堪細雨濕黃昏
夜寒那得穿花蝶

知是風流楚客魂

春入西湖到處花裙腰芳草抱山斜
盈盈解佩臨煙浦
脈脈當壚傍酒家

莫向霜晨怨未開
白頭朝夕自相催
斬新一朶含風露
恰似西廂待月來

洗盡鉛華見雪肌
要將真色鬪生枝
檀心已作龍涎吐
玉頰何勞獺髓醫

湖而初驚片片飛
尊前吹折最繁枝
何人會得春風意

怕見梅黃雨細時

長恨漫天柳絮輕只將飛舞占清明
寒梅似與春相避未解無私造物情

北客南來豈是家醉看參月半橫斜
他年欲識吳姬面秉燭三更對此花

與葉淳老侯敦夫張秉道同相視新河秉道有

詩次韻二首

君不見元帥府前羅萬戟濤頭未順千弩射至今鳳凰

山下路長借一箭開兩翼我鑿西湖還舊觀一眼已盡
西南碧又將回奪浮山險千艘夜下無南北坐陳三策
本人謀惟留一諾待我畫老病思歸真暫寓功名如幻
終何得從來自笑畫蛇足此事何殊食雞肋憐君嗜好
更迂闊得我新詩喜折屐江湖粗了我徑歸餘事後來
當潤色一庵閒卧洞霄宮井有丹砂水長赤

荆溪父老愁三害下斬長蛟本無賴平生倔强韓退之
文字猶為鰐魚戒石門之役萬金耳首鼠不為吾已隘

江湖開塞古有數兩鵠飛來告成壞勸農使者非常人
一言已破黎民駭上饒使君更超逸坐晚浮山如累塊
髯張乃我結襪生詩酒淋漓出狂怪我作水衡生作丞
他日歸朝同此拜

稷筍 并叙

稷筍狀如魚剖之得魚子味如苦筍而加甘芳蜀人以
饌佛僧甚貴之而南方不知也筍生膚毳中蓋花之方
孕者正二月間可剥取過此苦澀不可食矣取之無害

於木而宜於飲食法當蒸熟所施畧與筍同蜜煮酢浸
可致千里外今以餉殊長老

贈君木魚三百尾中有鵝黃子魚子夜叉剖癭欲分甘
籜龍藏頭敢言美願隨蔬果得自用勿使山林空老死
問君何事食木魚烹不能鳴固其理

次韻曹子方龍山真覺院瑞香花

幽香結淺紫來自孤雲岑骨香不自知色淺意殊深移
栽青蓮宇遂冠薜蘿林紉為楚臣佩散落天女襟君持

風霜節耳冷歌笑音一逢蘭蕙質稍回鐵石心置酒要
妍暖養花須晏陰及此陰晴間恐致慳嗇霖霖雲知易
散鷦鷯憂先吟明朝便陳迹試著丹青臨

次韻曹子方運判雪中同遊西湖

詞源灑灑波頭展清唱一聲巖谷滿未容雪積句先高
豈獨湖開心自遠雲山已作歌眉淺山下碧流清似眼
尊前侑酒只新詩何異書魚餐蠹簡

次韻仲殊雪中游西湖二首

夜半幽夢覺稍聞竹葦聲起續凍折絃為鼓一再行曲
終天自明玉樓已崢嶸有懷二三子落筆先飛雲共為
竹林會身與孤鴻輕秀語出寒餓身窮詩乃亨禪老復
何為笑指孤煙生我獨念粲者誰與予目成

寶雲樓閣開千門林靜初無一鳥喧閉戶莫教風掃地
卷簾疑有月臨軒水光瀲灩猶浮碧山色空濛已飲昏
乞得湯休奇絕句始知鹽絮是陳言

次韻參寥同前

朝來處處白氍毹鋪樓閣山川盡一如總是爛銀并白玉
不知奇貨有誰居

送小本禪師赴法雲

寓形天宇間出處會有役澹然都無營百年何由畢山
林等憂患軒冕亦戲劇我未即歸休師寧便安逸王城
滿豪傑議論紛黑白聖諦第一義對面誰不識師來亦
何事孤月挂空碧是身如浮雲安可限南北出岫本無
心既雨歸亦得珠泉有舊約何年挂鉶錫

書渾令公燕魚朝恩圖

咸寧英氣似汾陽
夜飲軍容出紅粧
不須纏頭萬匹錦
知卿未辦作呂強

息壤詩

并引

淮南子曰鯀堙洪水盜帝之息壤帝使祝融殺之于羽淵
今荊州南門外有狀若屋宇陷入地中而猶見其脊
者旁有石記云不可犯畚鍤所及輒復如故又頗以致
雷雨歲大旱屢發有應予感之乃為作詩其詞曰

帝息此壤以藩幽臺有神司之隨取而培帝勅下民無
敢或開惟帝不言以雷以雨惟民知之幸帝之恕帝茫
不知誰敢以告帝怒不常下土是震使民前知是役于
民無是墳者誰取誰予惟其的之是以射之

新渠詩

并叙

庚子正月予過唐州太守趙侯始復三陂疏召渠招懷
遠人散耕于唐子方為旅人不得親執壺漿簞食以與
侯勸送四方之來者獨為新渠詩五章以告于道路致

侯之意其詞曰

新渠之水其來舒舒溢流于野至于通衢渠成如神民
始不知問誰為之邦君趙侯新渠之田在渠左右渠來
奕奕如赴如湊如雲斯積如屋斯溜嗟唐之人始識秔
稌新渠之民自淮及潭挈其婦姑或走而顛王命趙侯
宥我新民無與王事以訖七年侯調新民爾既來止其
歸爾邑告爾隣里良田千萬爾擇爾取爾耕爾食遂為
爾有築室于唐孔碩且堅生為唐民飽粥與饘死塋于

唐祭有雉豚天子有命我惟爾安

顏樂亭詩

并叙

顏子之故居所謂陋巷者有井存焉而不在顏氏久矣
膠西太守孔君宗翰始得其地浚治其井作亭于其上
命之曰顏樂昔夫子以簞食瓢飲賢顏子而韓子乃以
為哲人之細事何哉蘇子曰古之觀人也必於其小者
觀之其大者容有偽焉人能碎千金之璧不能無失聲
於破釜能搏猛虎不能無變色於螫蠱孰知簞食瓢飲

之為哲人之大事乎乃作顏樂亭詩以遺孔君正韓子之說且以自警云

天生烝民為之鼻口美者可嚼芬者可嗅美必有惡芬必有臭我無天遊六鑿交鬪驚而不反跬步商受偉哉先師安此微陋孟賁股慄虎豹却走眇然其身中亦何有我求至樂千載無偶執瓢從之忽焉在後

東坡全集卷十八

欽定四庫全書

東坡全集卷十九

宋 蘇軾 撰

詩六十四首

次韻劉景文西湖席上

二老長身屹兩峰常撞大呂應黃鍾將辭鄴下劉公幹
却見雲間陸士龍白髮憐君畧相似青山許我定相從
吾今官已六百石慙愧當年邴曼容

次前韻答馬忠玉

坡陀巨麓起連峯積累當年慶自鍾靈運子孫俱得鳳
慈明兄弟孰非龍河梁會作看雲別詩社何妨載酒從
祇有西湖似西子故應宛轉為君容

予去杭十六年而復來留二年而去平生自覺
出處老少粗似樂天雖才名相遠而安分寡
求亦庶幾焉三月六日來別南北山諸道人
而下天竺惠淨師以醜石贈行作三絕句

當年衫鬢兩青青強說重臨慰別情衰髮祇今無可白

故應相對話來生

出處依稀似樂天
敢將衰朽較前賢
便從洛社休官去
猶有閒居二十年

在郡依前六百日
山中不記幾回來
還將天竺一峯去
欲把雲根到處栽

次韻答黃安中兼簡林子中

老去心灰不復然
一麾江海意方堅
那堪黃散付子度
空羨蘇杭養樂天
病肺一春難白酒
別腸三夜遶朱絃

羣仙政欲吾歸去共把清風借玉川

留別蹇道士拱辰

黑月在濁水何曾不清明寸田滿荆棘梨棗無從生何
時反吾真歲月今崢嶸屢接方外士早知俗緣輕庾桑
託雞鵠未肯化南榮晚識此道師似有宿世情笑指北
山雲訶我不歸耕仙人漢陰馬微服方地行咫尺不往
見煩子通姓名願持空手去獨控橫江鯨

次韻子由書王晉卿畫山水二首

老去君空見畫夢中我亦曾遊桃花縱落誰見水到人間伏流

山人昔與雲俱出俗駕今隨水不回賴我胸中有佳處
一樽時對畫圖開

又書王晉卿畫四首

山陰陳迹

當年不識此清真強把先生擬季倫等是人間一陳迹
聚蚊金谷本何人

雪谿乘興

谿山雪月兩佳哉
賓主談鋒夜轉雷
猶言不見戴安道
為問適從何處來

四明狂客

毫端偶集一微塵
何處谿山非此身
狂客思歸便歸去
更求教賜枉天真

西塞風雨

斜風細雨到來時
我本無家何處歸
仰看雲天真弱笠

旋收江海入蓑衣

破琴詩

并引

稽說房琯開元中嘗宰盧氏與道士邢和璞出游過夏
口村入廢佛寺坐古松下和璞使人鑿地得壺中所藏
婁師德與永禪師書笑謂琯曰頗憶此耶琯因悵然悟
前生之為永師也故人柳子玉寶此畫云是唐本宋復
古所臨者元祐六年三月十九日予自杭州還朝宿吳淞江
夢長老仲殊挾琴過予彈之有異聲就視琴頗損而有

十三絃予方歎惜不已殊曰雖損尚可修曰奈十三絃何殊不答誦詩云度數形名本偶然破琴今有十三絃此生若遇邢和璞方信秦箏是響泉予夢中了然識其所謂既覺而忘之明日晝寢復夢殊來理前語再誦其詩方驚覺而殊適至意其非夢也問之殊蓋不知是歲六月見子玉之子子文于京師求得其畫乃作詩并書所夢其上子玉名瑾善作詩及行草書復古名迪畫山水草木蓋妙絕一時仲殊本書生棄家學佛通脫無所

着皆奇士也

破琴雖未修中有琴意足誰云十三絃音節如佩玉新
琴空高張絃聲不附木宛然七絃箏動與世好逐陋矣
房次律因循墮流俗懸知董庭蘭不識無絃曲

題王晉卿畫後

醜石半蹲山下虎長松倒卧水中龍試君眼力看多少
數到雲峯第幾重

聽武道士彈賀若

清風終日自開簾涼月今宵肯挂簷琴裏若能知賀若
詩中定合愛陶潛

元祐六年六月自杭州召還汶公館我於東堂

閱舊詩卷次諸公韻三首

半熟黃梁日未斜玉堂陰合手栽花却尋三十年前味
未飯鐘時已飯茶

夢覺還驚屨響廊故人來炷影前香鬢鬢白盡成何事

一帖空存老遂良

法帖中有褚遂良書云
即日遂良鬚髮盡白

尺一東來喚我歸，衰年已迫故山期。
文章曹植今堪笑，却卷波瀾入小詩。

次韻子由書王晉卿畫山水一首而晉卿和二

首

誤點故教同子敬，雜篇真欲擬湯休。
壠雲寄我山中信，雪月追君溪上舟。
會看飛仙虎頭篋，却來顛倒拾遺裘。
子美詩云天吳及紫鳳顛倒在短褐
王孫辦作玄真子，細雨斜風不濕鷗。
此境眼前聊妄想，幾人林下是真休。
我今心似一潭月，

君已身如萬斛舟看畫題詩雙鶴鬢歸田送老一羊裘
明年兼與士龍去萬頃蒼波沒兩鷗

感舊詩

并引

嘉祐中予與子由同舉制策寓居懷遠驛時年二十六
而子由二十三耳一日秋風起雨作中夜脩然始有感
慨離合之意自爾宦游四方不相見者十常七八每夏
秋之交風雨作木落草衰輒淒然有此感蓋三十年矣
元豐中謫居黃岡而子由亦貶筠州嘗作詩以記其事

元祐六年予自杭州召還寓居子由東府數月復出領
汝陰時予年五十六矣乃作詩留別子由而去

牀頭枕馳道雙闕夜未央車轂鳴枕中客夢安得長
新秋入梧葉風雨驚洞房獨行慚月影悵焉感初涼
筮仕

記懷遠謫居念黃岡一往三十年此懷未始忘扣門呼

阿同

子由一字同叔

安寢已太康青山映華髮歸計三月糧我

欲自汝陰徑上潼江章想見冰檠中石蜜與柿霜

子欲請東

川而歸二物憐子遇明主憂患已再嘗報國何時畢我

皆東川所出

心久已降

西湖秋涸東池魚窘甚因會客呼網師遷之西
池為一笑之樂夜歸被酒不能寐戲作放魚
一首

東池浮萍半粘塊裂碧跳青出魚背西池秋水尚涵空
舞閣搖深吹荇帶吾僚有意為遷居老守縱饒那忍膾
縱橫爭看銀刀出漫灑初驚玉花碎但愁數罟損鱗鬣
未信長堤隔濤瀨濺濺發發須臾間圍圍洋洋尋丈外

安知中無蛟龍種尚恐或有風雲會明年春水漲西湖
好去相忘渺淮海

復次放魚前韻荅趙承議陳教授

擾擾萬生同大塊搶榆不羨培風背青丘已吞雲夢芥
黃河復繚天門帶長譏韓子隘且陋一飽鯨魚何足膾
東坡也是可憐人披挾泥沙收細碎逝將歸休八節灘
又欲往釣七里瀨正似此魚逃網中未與造物遊數外
且將新句調二子湖上秋高風月會為君更喚木腸兒

脚扣兩舷歌小海

九月十五日觀月聽琴西湖一首示坐客

白露下衆草碧空卷微雲孤光為誰來似為我與君水
天浮四坐河漢落酒樽使我冰雪腸不受麴蘖醺尚恨
琴有絃出魚亂湖紋哀彈本舊曲妙耳非昔聞良時失
俯仰此見寧朝昏懸知一生中道眼無由渾

復次前韻謝趙景貺陳履常見和兼簡歐叔弼

兄弟

能詩李長吉識字揚子雲端能居此府坐歎獲兩君逝
將江湖去浮我五石樽眷焉復少留尚為世所醺或勸
莫作詩兒輩工織紋朱絃寄三歎未害俗耳聞共尋兩
歐陽伐薪照黃昏是家有甘井汲多終不渾

送歐陽主簿赴官韋城四首

鳳雛驥子日相高白髮蒼顏笑我曹讀遍牙籤三萬軸
却來小邑試牛刀

出處年來恨不齊一樽臨水記分携江湖咫尺吾將老

汝潁東流子却西

白馬津頭春水來白魚猶喜似江淮使君已復冰堂酒
更勸重新畫舫齋

道傍垂白定沾巾正似當年綠髮新故國依然喬木在
典刑復見老成人

泛潁

我性喜臨水得潁意甚奇到官十日來九日河之湄吏
民笑相語使君老而癡使君實不癡流水有令姿遠郡

十餘里不駛亦不遲上流直而清下流曲而漪畫船俯
明鏡笑問汝為誰忽然生鱗甲亂我鬚與眉散為百東
坡頃刻復在茲此豈水薄相與我相娛嬉聲色與臭味
顛倒眩小兒等是兒戲物水中少磷淄趙陳兩歐陽同
參天人師觀妙各有得共賦泛潁詩

六觀堂老人草書詩

物生有象象乃滋夢幻無根成斯須方其夢時了非無
泡影一失俯仰殊清露未晞電已徂此滅滅盡乃真吾

云如死灰實不枯逢場作戲三昧俱化身為醫忘其軀
草書非學聊自娛落筆已喚周越奴蒼鼠奮髯飲松腴
剡藤玉板開雪膚遊龍天飛萬人呼莫作羞澁羊氏姝
六觀取金剛經夢幻等六物也老人僧了性精於
醫而善草書下筆有遠韻而人莫知貴故作此詩

次韻劉景文見寄

淮上東來雙鯉魚巧將書信渡江湖細看落墨皆松瘦
想見掀髯正鶴孤烈士家風安用此書生習氣未能無
莫因老驥思千里醉後哀歌缺唾壺

次韻趙景貺督兩歐陽詩破陳酒戒

商也哀未散歲月忽已秋
祥琴雖未調餘悲不敢留
矧此乃韻語未入金石流
義之生五之總角出銀鈎
吾家有二許下筆兩不休
君言不能詩此語人信不
千鍾斯為堯百榼斯為丘
陋矣陶士衡當以大白浮
酒中那有失醉則不驚鷗
明當罰二子已洗兩玉舟

叔弼云履常不飲故不作詩勸履常飲

我本畏酒人臨觴未嘗訴
平生坐詩窮得句忍不吐

酒如好詩肝胃生滓汙用此較得喪天豈不足付吾儕
非二物歲月誰與度悄焉得長愁為計已大誤二歐非
無詩恨子不飲故強為醕一酌將非作愁具成言如皦
日援筆當自賦他年五君詠山王一時數

臂痛謁告作三絕句示四君子

公退清閒如致仕酒餘歡適似還鄉不妨更有安心病
卧看縈簾一炷香

心有何求遣病安年來古井不生瀾祇愁戲瓦閒童子

却作泠泠一水看

小閣低窓卧晏溫了然非默亦非言維摩示病吾真病
誰識東坡不二門

到穎未幾公帑已竭齋廚索然戲作數句

我昔在東武吏方謹新書齋空不知春客至先愁予采
杞聊自誑食菊不敢餘歲月今幾何齒髮日向踈幸此
一郡老依然十年初夢飲本來空真飽竟亦虛尚有赤
脚婢能烹頰尾魚心知皆夢耳慎勿歌歸歎

景貺履常屢有詩督叔弼季默唱和已許諾矣

復以此句挑之

君家文律冠西京旋築詩壇按酒兵袖手莫輕真將種

致師須得老門生明朝鄭伯降誰受昨夜條侯壁已驚

從此醉翁天下樂還應一舉百觴傾

文忠公贈蘇梅詩云我亦願助勇鼓

旗譟其旁快哉天下樂一酌宜百觴

贈月長老

天形倚一笠地水轉兩輪五霸之所運毫端栖一塵功

名半幅紙兒女浪苦辛子有折足鐺中容五合陳十年
此中過却是英特人延我地爐坐語軟意甚真白灰如
積雪中有紅麒麟勿觸紅麒麟作灰維那瞋拱手但默
坐墻壁方諄諄今宵恨客多汙子白氎巾後夜當獨來
不煩主與賓蒲團坐紙帳自要觀我身

次韻荅錢穆父以軾得汝陰用杭越唱酬韻作
詩見寄

大耿疲勞已離羣小馮慈愛且當門

軾本以舍弟
親嫌請郡

玉堂

不著扶犁手霜鬢偏宜畫鹿輜豪傑雖無兩王繼

子直深父

風流猶有二歐存

叔弼季默

清詩已入新歌舞要使邦人識

雅言

韓退之孟郊墓銘云以昌其詩舉此問王定國

當昌其身耶昌其詩也來詩下語未契作此

答之

昌身如飽腹飽盡還復饑昌詩如膏面為人作容姿不如昌其氣鬱鬱老不衰雖云老不衰劫壞安所之不如

昌其志志一氣自隨養之塞天地孟軻不吾欺人言魏
勃勇股栗向小兒何如魯連子談笑却秦師慎勿怨謗
讒乃我得道資淤泥生蓮華糞壤出菌芝賴此善知識
使我枯生美吾言豈須多冷暖子自知

送歐陽推官赴華州監酒

我觀文忠公四子皆超越仲也珠徑寸照夜光如月好
詩真脫兔下筆先落鶚知音如周郎議論亦英發文章
乃餘事學道探玄窟死為長白主名字書絳闕

熙寧之末仲純

父見僕於京城之東曰吾夢道士持告身授吾曰傷心上帝命汝為長白山主此何祥也明年仲純父沒清潁尾已伴白鷗沒喜見三少年俱有千里骨千里不難到莫遣歷塊蹶臨分出苦語願子書之笏

十月十四日以病在告獨酌

翠柏不知秋空庭失搖落幽人得嘉蔭露坐方獨酌月華稍澄穆霧氣尤清薄小兒亦何知相語翁正樂銅爐燒柏子石鼎煮山藥一盃賞月露萬象紛醺酢此生獨何幸風纜欣初泊逝逃顏蹶網行赴松喬約莫嫌風有

待漫欲戲寥廓冷然心境空髣髴來笙鶴

獨酌試藥玉酒琰有懷諸君子明日望夜月底
佳景不可失作詩招之

鎔鉛煑白石作玉真自欺琢削為酒盃規摹定州瓷荷
心雖淺狹鏡面良渺瀰持此壽佳客到手不容辭曹侯
天下平定國豈其師一飲至數石溫克頗似之風流越
王孫詩酒屢出奇喜我有此客玉盃不徒施請君詰歐
陳問疾來何遲呼兒掃月榭扶病及良時

歐季默以油煙墨二丸見餉各長寸許戲作小

詩

書窓拾輕煤佛帳掃餘馥辛勤破千夜收此一寸玉癡
人畏老死腐朽同草木欲將東山松湮盡南山竹墨堅
人苦脆未用歎不足且當注蟲魚莫草三千牘

明日復以大魚為餽重二十觔且求詩故復戲
之

漢庭九尺人誰似老方朔那將一寸金令足三冬學餉

魚欲自洗鱗尾光卓犖我是騎鯨手聊堪充鹿角

和趙景貺栽檜

汝陰多老檜處處屯蒼雲地連丹砂井物化青牛君時

有再生枝

頽之靈壇觀亦有再生檜

還作左紐紋王孫有古意書室

延青芬應憐四孺子不墮凡木羣體備松柏姿氣含芝
朮薰初扶鶴立骨未出龍纏筋巢根白蟻亂網葉秋蟲
紛乃知蔽芾初甚要封植勤他年皮三寸狐鼠了不聞

葉待制求先墳永慕亭詩

靈區有異產化國無潛珍承平百年間簪纓半齊民建
溪富奇偉葉氏初隱淪森然見喬木其下維德人佳哉
鬱葱葱氣若鳳與麟聯翩出儒將豈惟十朱輪新松無
鹿觸舊柏有烏馴待公歸上冢淚葉乃肯春

與趙陳同過歐陽叔弼新治小齋戲作

江湖渺故國風雨傾舊廬東來三十年愧此一束書尺
椽亦何有而我常客居羨君開此室容膝真有餘拊牀
琴動搖弄筆窓明虛後夜龍作雨天明雪填渠

時方禱
雨龍祠

作此句時星斗燦然四
更風雨大至明日乃雪
夢回聞剝啄誰乎趙陳予添丁
走沽酒通德起挽蔬主孟當啗我玉鱗金尾魚一醉忘
其家此身自蘧蔭

聚星堂雪

并敘

元祐六年十一月一日禱雨張龍公得小雪與客會飲
聚星堂忽憶歐陽文忠公作守時雪中約客賦詩禁體
物語於艱難中特出奇麗爾來四十餘年莫有繼者僕
以老門生繼公後雖不足追配先生而賓客之美殆不

減當時公之二子又適在郡故輒舉前令各賦一篇以
為汝南故事云

窓前暗響鳴枯葉龍公試手行初雪暎空先集疑有無
作態斜飛正愁絕衆賓起舞風竹亂老守先醉霜松折
恨無翠袖點橫斜祇有微燈照明滅歸來尚喜更鼓永
晨起不待鈴索掣未嫌長夜作衣稜却怕初陽生眼纈
欲浮大白追餘賞幸有回飈驚落屑模糊檜頂獨多時
歷亂瓦溝裁一瞥汝南先賢有故事醉翁詩話誰續說

當時號令君聽取白戰不許持寸鐵

歐陽叔弼見訪誦陶淵明事歎其絕識叔弼既

去感慨不已而賦此詩

淵明求縣令本緣食不足束帶向督郵小屈未為辱翻
然賦歸去豈不念窮獨重以五斗米折腰營口腹云何
元相國萬鍾不滿欲胡椒銖兩多安用八百斛以此殺
其身何趙抵鵲玉往者不可悔吾其反自燭

喜劉景文至

天明小兒更傳呼髯劉已到城南隅尺書真是髯手迹
起坐熨眼知有無令人不作古人事今世有此古丈夫
我聞其來喜欲舞病自能起不用扶江淮旱久塵土惡
朝來清雨濯鬚鬚相看握手了無事千里一笑無乃迂
平生所樂在吳會老死欲葬杭與蘇過江西來二百日
冷落山水愁吳姝新堤舊井各無恙參寥六一豈念吾
別後新詩巧摹寫袖中知有錢塘湖

禱雨龍公既應劉景文有詩次韻

張公晚為龍抑自龍中來伊昔風雲會咄嗟潭洞開精
誠苟可貫賓主真相陪洞簫振羽舞白酒浮雲疊言從
關洲妃遠去焦氏臺倒傾瓶中雨一洗麥上埃破旱不
論功乘雲却空回嗟龍與我輩用意豈遠哉使君今子
義英風冠東萊笑說龍為友幽明莫相猜

劉景文家藏樂天身心問答三首戲書一絕其
後

淵明形神自我樂天身心相物而今月下三人他日當

金史卷之九
卷十九
成幾佛

西湖戲作

一士千金未易償我從陳趙兩歐陽
舉鞭拍手笑山簡
祇有并兒一葛強

送歐陽季默赴闕

先生豈止一懷祖郎君不減王文度
膝上幾日今白鬚
令我眼中見此父汝南相從三晦朔
君去苦早我來暮
霜風淒緊正脫木潁水清淺可立鷺
莫辭白酒瀉香泉

已覺扁舟掠新渡坐看士衡執別手更遣夢得出奇句
郎君可是莞庫人乃使驥驤隨蹇步置之行矣無足道
賢愚豈在遇不過

用前韻作雪詩留景文

萬松嶺上橫千葉載酒年年踏松雪劉郎去後誰復來
花下有人心斷絕東齋夜坐搜雪句兩手龜拆霜須折
無情豈亦畏嘲弄穿簾入戶吹燈滅紛紛兒女事所以
碧海長鯨君未掣朝來雲漢接天流顧我小詩如點纈

歐陽趙陳在戶外急掃中庭鋪木屑交遊雖似雪柏堅
聚散行作風花瞥晴光融作一尺泥歸有何事真無說
泥乾路穩放君去莫倚馬蹄如踣鐵

和劉景文見贈

元龍本志陋曹吳豪氣崢嶸老不除失路今為噲等伍
作詩猶似建安初西來為我風薰面獨卧無人雪縞廬
留子非為十日飲要令安世誦亡書

和劉景文雪

占雨又得雪龜寧欺我哉似知吾輩喜故及醉中來童子愁冰硯佳人苦膠盃那堪李常侍入蔡夜銜枚

次前韻送劉景文

白雲在天不可呼明月豈肯留庭隅怪君西行八百里清坐十日一事無路人不識呼尚書但見凜凜雄千夫

君一馬兩僕率然相訪逆旅多呼尚書意謂君都頭也

豈知入骨愛詩酒醉倒正

欲蛾眉扶一篇向人寫肝肺四海知我霜鬢鬚

君前有詩見寄

云四海共知霜鬢滿重陽曾揜菊花無

歐陽趙陳皆我有豈謂夫子駕復

迂邇來又見三黜柳共此暖熱餐羶蘇酒散酸薄紅粉
暗祇有潁水清而妹一朝寂寞風雨散對影誰念月與吾
郡中日與歐陽叔弼趙景貺陳履常相從而景文復至
不數日柳戒之亦見過賓客之盛頃所未有然不數日
叔弼景文戒之皆去矣何時歸帆泝江水春酒一變甘棠湖

景文近卜

居九江近甘棠湖

以屏山贈歐陽叔弼

漫郎天骨清生與世俗異學道新有得為貧聊復仕每
於紅塵中常起青霞志屏山輟贈子莫遺汗簪珥寓目

紫翠間安眠本非睡夢中化為鶴飛入長松寺

新渡寺席上次趙景貺陳履常韻送歐陽叔弼
此來諸君唱和叔弼但袖手旁睨而已臨別
忽出一篇頗有淵明風製坐皆驚歎

神屠不目全妙額惟粒半更刀乃族庖倚市必醜悍平
生魏公籌忽斲郢人授詩書亦何用適道須此館多言
雖數窮微中或排難子詩如清風簫簫發將旦胡為久
閉匿綺語真自患許時笑我癡隔屋相咏歎竟識彥道

否絕叫呼百萬清朝固多士人門子皆冠莫言清潁水
從此隔河漢異時我獨來得魚楊柳貫持歸不忍食尺
素解悽斷中有清圓句銅丸飛柘彈春愁結凌澌正待
一笑泮百篇儻寄我呻吟鄭人緩

東坡全集卷十九

欽定四庫全書

東坡全集卷二十

宋 蘇軾 撰

詩六十二首

次韻趙景貺春思且懷吳越山水

歲華來無窮老眼久已靜春風如繫馬未動意先騁西
湖忽破碎鳥落魚動鏡縈城理枯瀆放閘起膠艇願君
營此樂宦事何時竟

清河西湖三
閘督君成之

思吳信偶然出處付

前定飄然不繫舟乘此無盡興醉翁行樂處草木皆可

敬明朝游北渚急掃黃葉徑白酒真到齊紅裙已放鄭

酒尚有香泉一壺為樂
全先生服不作樂也

次韻陳履常張公龍潭

經明宣城宰家此百尺瀾鄭翁不量力敢以非意干玄

黃雜兩戰絳青表雙螭

事見龍
公碑

烈氣斃強敵仁心惻饑

寒精誠禱必赴苟簡求亦難蕭條麥麴枯浩蕩日月寬

念子無吏責十日勤征鞍春蔬得雨雪少助先生槃龍

不憚往來而我獨宴安閑閣默自責神交清夜闌

竹間亭小酌懷歐陽叔弼季默呈趙景貺陳履

常

歲暮自急景我閒方緩觴醉飲西湖晚步轉北渚長地
坐畧少長意行無澗岡久知薺麥青稍喜榆柳黃盎盎
春欲動漱漱夜未央水天鷗鷺靜月霧松檜香撫景方
婉婉懷人重淒涼豈無一老兵坐念兩歐陽我意正康
鹿君才亦圭璋此會恐難久此歡不可忘

臘梅一首贈趙景貺

天工點酥作梅花此有臘梅禪老家蜜蜂採花作黃蠟
取蠟為花亦其物天工變化誰得知我亦兒嬉作小詩
君不見萬松嶺上黃千葉玉葉檀心兩奇絕醉中不覺
度千山夜聞梅香失醉眠歸來却夢尋花去夢裏花仙
覓奇句此間風物屬詩人我老不飲當付君君行適吳
我適越笑指西湖作衣鉢

送王疎朝散赴闕

我家衡山公清而畏人知臧否不出口默識如著龜擢

子拱把中云有驥駉姿胡為三十載尚作窮苦詞丈夫
不妄語未効此何疑竭來清潁上淚濕中郎詩怪我一
年長而作十年哀同時幾人在豈敢怨白髭願言指松
栢永與霜雪期

伯父為衡州日與
君相知有送行詩

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯魯
經丹化米親授棗如瓜雲蒸作霧楷火滅噉雨已自此
養鉛鼎無窮走河車至今許玉斧猶事萼綠華

張魯見
永州何

仙姑得藥餌之人疑其以此壽也故我本三生人疇昔有丹化米萼綠華之句皆女仙事

一念差前生或草聖習氣餘驚蛇儒臞謝赤松佛縛慚丹霞時時一篇出擾擾四座譁清詩得可驚信美詞多夸回車入官府治具隨貧家萍蘆與豆粥亦可成咄嗟閣立本職貢圖

貞觀之德來萬邦浩如滄海吞河江音容儉穉服奇麗橫絕嶺海逾濤瀧珍禽瑰產爭牽扛名王解辮却蓋幢粉本遺墨開明窓我喟而作心未降魏徵封倫恨不雙

次韻王滁州見寄

斯人何似似春雨歌舞農夫怨行路君看永叔與元之
坎軻一生遭口語兩翁當年鬢未絲玉堂揮翰手如飛
教得滁人解吟詠至今里巷嘲輕肥君家聯翩盡卿相
獨來坐歎谿山上笑捐浮利一雞肋多取清名幾熊掌
丈夫自重貴難售兩翁今與青山久後來太守更風流
要伴前人作詩瘦我勸承明苦求出到處遺蹤尋六一
憑君試與問琅邪許我來游莫難色

趙景貺以詩求東齋榜銘昨日聞都下寄酒來
戲和其韻求分一壺作潤筆也

王孫天麒麟眸子與而澈囊空學愈富屋陋人更傑我
老書益放筆落座爭掣欲求東齋銘要飲西湖雪長餅
分未到小硯乾欲裂不似淳于髡一石要燭滅

洞庭春色

并引

安定郡王以黃柑釀酒謂之洞庭春色色香味三絕以
餉其猶子德麟德麟以飲予為此詩醉後信筆頗有省

拖風氣

二年洞庭秋香霧長嘆手今年洞庭春玉色疑非酒賢

王文字飲醉筆蛟蛇走既醉念君醒遠餉為我壽餅開

香浮座瓊凸光照牖方傾安仁醪

潘岳笙賦云披黃苞以授柑傾綠瓷以酌

醪

莫遣公遠齏

明皇食柑凡千餘枚皆闕一瓣問進柑使者云中塗嘗有道士齏之蓋羅公遠

也要當立名字未可問升斗應呼釣詩鉤亦號掃愁帚

君知蒲萄惡止是嫫姆黥須君灑海盃澆我談天口

送路都曹

并引

乖崖公在蜀有錄曹參軍老病廢事公責之曰胡不歸
明日參軍求去且以詩留別其畧曰秋光都似宦情薄
山色不如歸意濃公驚謝之曰吾過矣同僚有詩人而
吾不知因留而慰薦之予幼時聞父老言恨不問其姓
名今都曹路君以小疾求致仕予誦此事留之不可乃
採前人意作詩送之并邀趙德麟陳履常各賦一篇
積雪困桃李春心誰為容淮光釀山色先作歸意濃我
亦倦游者君恩繫踈慵欲留耿介士伴我衰遲蹤吏課

升斗積嶠嶇等鈇春那將露電身坐待收千鍾結髮空
百戰市人看先封誰能搔白首抱關望夕烽子意亮已
成我言寧復從恨無乖崖老一洗芥蒂胸我田荆谿上
伏臘亦粗供懷哉江南路會作林下逢

次韻陳履常雪中

可憐擾擾雪中人饑飽終同寓一塵老檜作花真強項
凍鳶儲肉巧謀身忍寒吟咏君堪笑得煖謹呼我未貧
坐聽屐聲知有路擁裘來看玉梅春

二鮮于君以詩文見寄作詩為謝

我懷元祐初珪璋滿清班維時南隆老奉使獨未還迂

叟向我言青齊歲方艱斯人乃德星遣出虛危間

司馬溫公

謂軾曰子駿福星也京東人困甚且令往彼

召用既晚矣天命良復慳一朝

失老驥寂寞空帝閑至今清夜夢枕衾有餘潛喜聞二

三子結髮師閔顏高論傾河漢清詩鳴珮環遙知三日

雪積玉埋松山誰念此幽桂坐蒙榛與管故人在潁尾

投詩清冷灣

次韻趙德麟雪中惜梅且餉柑酒三首

千花未分出梅餘
遣雪摧殘計已疎
卧聞點滴如秋雨
知是東風爲掃除

閨苑千葩映玉宸
人間祇有此花新
飛霙要欲先桃李
散作千林火迫春

蹀躞嬌黃不受韉
東風暗與色香歸
偶逢白墮爭春手
遣入王孫玉笋飛

和陳傳道雪中觀燈

新年樂事歎何曾
閑閣燒香一病僧
未忍便傾澆別酒
且來同看照愁燈
潁魚躍處新亭近
湖雪消時畫舫升
祇恐樽前無此客
清詩還有士龍能

閱世亭詩贈任仲微

任公鎮西南嘗贈繞朝策
當時若盡用善陣無赫赫淒涼十年後邪正久已白
却留封德彝天意眇難測
象賢真驥種號訴甘百謫
豈云報私讐禍福指絡脈
高才食舊德但恐里門窄
傷心千騎歸贈印黃壤隔
惟有亭前

檜閱世不改色千年與井在記此王粲宅

新渡寺送任仲微

春陰欲落雪野氣方升雲我游清潁尾想見翠被君古
來聚散地與子復言分倦游安稅駕瘦田失歸耘獨宿
古寺中荒雞亂鳴羣送子以曉角幽幽醒時聞

送運判朱朝奉入蜀七首

藹藹青城雲娟娟峨眉月隨我西北來照我光不滅
我在塵土中白雲呼我歸我遊江湖上明月濕我衣

岷峨天一方雲月在我側謂是山中人相望了不隔
夢尋西南路默數長短亭似聞嘉陵江跳波吹錦屏
送君無一物清江飲君馬路穿慈竹林父老拜馬下
不用驚走藏使者我友生聽訟如家人細說為汝評
若逢山中友問我歸何日為話腰腳輕猶堪踏泉石

病中夜讀朱博士詩

病眼亂燈火細書數塵沙君詩如秋露淨我空中花古
語多妙寄可識不可誇巧笑在頰頰哀音餘摻撾曾坑

一掬春紫餅供千家懸知貴公子醉眼無真茶崎嶇爛
石上得此一寸芽緘封勿浪出湯老客未嘉

趙德麟餞飲湖上舟中對月

老守惜春意主人留客情官餘閒日月湖上好清明新
火發茶乳溫風散粥飭酒闌紅杏閣日落大堤平清夜
除燈坐孤舟擘岸撐逮君幘未墮對此月猶橫

贈朱遜之

并引

元祐六年九月與朱遜之會議于潁或言洛人善接花

歲出新枝而菊品尤多遜之曰菊當以黃為正餘可鄙也昔叔向聞駸蔑一言知其為人予於遜之亦云

黃花候秋節遠自夏小正坤裳有正色鞠衣亦令名一從人偽勝遂與天力爭易性寓非族改顏隨所令新奇既易售粹駁宜相傾疾惡逢伯厚識真似淵明君言我所印世論誰改評願君為霜風一掃紫與頰

和趙德麟送陳傳道

二陳既妙士兩歐惟德人王孫乃龍種世有籥雲鱗五

君從我游頌寫出怪珍俗物敗人意茲游實清醇邠知
有聚散佳夢失欠伸我舟下清潁淮水吹玉塵君行踏
曉月疎木挂寸銀尚寄別後詩翦刻淮南春

上巳日與二子追過游塗山荆山記所見

此生終安歸還軫天下半竭來乘標廟復作微禹歎

昔自

南河赴杭州過此
蓋二十二年矣

從祠及彼呱

有敬廟

像設偶此粲

謂塗山氏

秦祖當侑坐

廟有伯翳

夏郊亦薦裸

有鯀廟

可憐淮海人尚記

弧矢旦

淮南人謂禹以六月六日生是日數萬人會山上雖傳記不載然相傳如此

荆山碧相

照楚水清可亂荆人有餘坑美石肖溫瓚

荆山下有卞氏採玉坑石

色如玉不受鐫刻取出山下輒變色不復溫瑩

龜泉木杪出牛乳石池漫

龜泉在荆

山下色白而甘真陸羽所謂石池漫流者有石記云唐貞元中隨白龜流出

小兒強好古侍

史笑流汗歸時蝙蝠飛炬火記遠岸

淮上早發

澹月傾雲曉角哀小風吹水碧鱗開此生定向江湖老

默數淮中十往來

次韻徐仲車

仲車耳聾

惡衣惡食詩愈好恰似霜松轉春鳥蒼蠅莫亂遠雞聲

世上誰如公覺早八年看我走三州

元豐八年予赴登州元祐四年赴杭

州今赴揚州皆見仲車

月自當空水自流人間擾擾真螻蟻應笑

人呼作鬪牛

次韻林子中春日新堤書事見寄

東都寄食似孤雲襖被真成一宿賓收得玉堂揮翰手

却為淮月弄舟人羨君湖上齋搖碧笑我花時甌有塵

為報年來殺風景連江夢雨不知春

來詩有芍藥春之句揚州近歲率為

此會用花十餘萬枝吏緣
為奸民極病之故罷此會

送陳伯修察院赴闕

裕陵固天縱筆有雲漢姿嘗重連山象不數秋風辭龍
騰與虎變狸豹復何施我窮真有數文字乃見知聞君
射策日妙語發疇咨一日喧萬口驚倒同舍兒豈知二
十年道路猶遲遲苦言如藥石膜眩終見思屈信反覆
手獨於君可疑四門方穆穆行矣及此時

送張嘉父長官

都城昔傾蓋駿馬初服輶再見江湖間秋鷹已離韝于
今三會合每進不少留豫章既可惜瑚璉誰當收微官
有民社妙割無雞牛歸來我益敬器博用自周百年子
初筵我已迫旅酬但當記苦語高節貫白頭

軾在潁州與趙德麟同治西湖未成改揚州三
月十六日湖成德麟有詩見懷次韻

太山秋毫兩無窮鉅細本出相形中大千起滅一塵裏
未覺杭潁誰雌雄

來詩云與杭爭雄

我在錢塘拓湖淥大堤士

女爭昌丰六橋橫絕天漢上北山始與南屏通忽驚二
十五萬丈老對席卷蒼雲空竭來頽尾弄秋色一水縈
帶昭靈宮坐思吳越不可到借君月斧修腫朧二十四
橋亦何有換此十頃玻瓈風雷塘水乾禾黍滿寶釵耕
出餘鸞龍明年詩客來弔古伴我霜夜號秋蟲
德麟見約來揚
寄居亦有
意求揚倅

次韻趙德麟西湖新成見懷絕句

壺中春色

謂洞度
春色也

飲中仙騎鶴東來獨惘然猶有趙陳

同李郭不妨同泛過湖船

再次韻趙德麟新開西湖

使君不用山鞠窮，饑民自逃泥水中。
欲將百瀆起凶歲，免使飢石愁揚雄。
西湖雖小亦西子，縈流作態清而丰。
千夫餘力起三閘，焦陂下與長淮通。
十年憔悴塵土窟，清瀾一洗啼痕空。
王孫本自有仙骨，平生宿衛明光宮。
一行作吏人不識，正似雲月初朦朧。
時臨此水照冰雪，莫遣白髮生秋風。
定須却致兩黃鵠，新與上帝開濯龍。

湖成君歸侍帝側燈花已綴釵頭蟲

予以潁人苦饑奏乞留黃河夫萬人

修境內溝洫詔許之因以餘力浚治此湖

到官病勸未嘗會客毛正仲惠茶乃以端午小

集石塔戲作一詩為謝

我生亦何須一飽萬想滅胡為設方丈養此膚寸舌爾
來又衰病過午食輒噎繆為淮海帥每愧廚傳缺爨無
欲清人奉使免內熱空煩赤泥印遠致紫玉玦為君伐
羔豚歌舞菰黍節禪窓麗午景蜀井出冰雪坐客皆可

居葛衣草屨隨僧蔬能與冷泉作主一百日不用二十四考書中書

滕達道挽詞二首

先帝知公早虛懷第一人至今詩禮將惟數武宣臣材

大雖難用時來亦少信高平風烈在威敏典刑新

公少受知

於范希文孫元晚

空試乘邊策寧留相漢身淒涼舊部曲淚濕

塚前麟

雲夢連江雨樊山落木秋公方占賈鵬我正買龔牛共

有江湖樂俱懷歆歆憂荆溪欲歸老浮玉偶同游骭髀
儀刑在驚呼歲月道回頭雜歌哭挽語不成謳

次韻蘇伯固遊蜀岡送李孝博奉使嶺表

新苗未沒鶴老葉方翳蟬綠渠浸麻水白板燒松煙笑
窺有紅頰醉卧皆華顛家家機杼鳴樹樹槩棗懸野無
佩犢子府有騎鶴仙觀風嶠南使出相山東賢渡江弔
狠石過嶺酌貪泉與君步徙倚望彼修連娟願及南枝
謝早隨北鴈翩歸來春酒熟共看山櫻然

送晁美叔

我年二十無朋儔當時四海一子由君來扣門如有求
頽然病鶴清而修醉翁遣我從子游翁如退之蹈軻丘

尚欲放子出一頭

嘉祐初軾與子由寓興國浴室美叔忽見訪云君從歐陽公游久矣公令

我來與子定交謂子必名世老夫亦須放他出一頭地

酒醒夢斷四十秋病鶴不

病骨愈虯惟有我顏老可羞醉翁賓客散九州幾人白

髮還相收我如懷祖拙自謀正作尚書已過優君求會

稽實良籌往看萬壑爭交流

君近乞越州

王文玉挽詞

才名誰似廣文寒月斧雲斤琢肺肝玄宴一生都卧病
子雲三世不遷官幽蘭空覺香風在宿草何曾淚葉乾
猶喜諸郎有曹志文章還復富波瀾

送芝上人游廬山

二年閱三州我老不自惜團團如磨牛步步踏陳迹豈
知世外人長與魚鳥逸老芝如雲月炯炯時一出比年
三見之常若有所適逝將走廬阜計闕道愈密吾生如

寄耳出處誰能必江南千萬峰何處訪子室

送程德林赴真州

君為縣令元豐中吏貪功利以病農君欲言之路無從

移書諫臣以自通

諫臣寔受之也

元豐天子為改容我時匹馬

江西東問之逆旅言頗同老人愛君如劉寵小兒敬君如魯恭爾來明目達四聰收拾駟駿冀北空君為赤令有古風政聲直入明光宮天廡如海養羣龍并收其子

豈不公

君之子祁舉制策文
學行義為時所稱

白沙何必煩此翁

谷林堂詩

深谷下窈窕高林合扶踈美哉新堂成及此秋風初我
來適過雨物至如娛予穉竹真可人霜節已專車老槐
苦無賴風花吹填渠山鴉爭呼號谿蟬獨清虛寄懷勞
生外得句幽夢餘古今正自同歲月何必書

予少年頗知種松手植數萬株皆中梁柱矣都
梁山中見杜輿秀才求學其法戲贈二首

露宿泥行草棘中十年春雨養髯龍如今尺五城南杜

欲問東坡學種松

君方掃雪收松子我已開榛得茯苓為問何如插楊柳
明年飛絮作浮萍

行宿泗間見徐州張天驥次舊韻

二年三躡過淮舟款段還逢馬少游無事不妨長好飲
著書自要且窮愁孤松早偃元非病倦鳥雖還豈是休
更欲河邊幾來往祇今霜雪已蒙頭

次韻劉景文贈傅曦秀才

窈眇文章宜和寡
崢嶸肝肺亦交難
未能飛瓦彈清角
肯便投泥戲潑寒
忽見秋風吹落水
遙知霜葉滿長安
詩成送與劉夫子
莫遣孫郎帳下看

在彭城日與定國為九日黃樓之會
今復以是日相遇于宋
凡十五年憂樂出處有不可勝言者
而定國學道有得
百念灰冷而顏益壯
顧予衰病心形俱瘁
感之作詩

菊蕊萸囊自古傳
長房寧復是臞仙
應從漢武橫汾日

數到劉公戲馬年對玉山人雖老矣見恒河性故依然
王郎九日詩千首今賦黃樓第二篇

九日次定國韻

朝菌無晦朔蟪蛄疑春秋南柯已一世我眠未轉頭仙
人視吾曹何異蜂蟻稠不知蠻觸氏自有兩國憂我觀
去來今未始一念留奔馳竟何得而起無窮羞王郎誤
涉世屢獻久不醕黃金散行樂清詩出窮愁俛仰四十
年始知此生浮軒裳陳道路往往兒童收封侯起大第或

是君家駒似聞負販人中有第一流炯然徑寸珠藏此
百結裘意行無車馬倏忽畧九州邂逅獨見之天與非
人謀笑我方醉夢衣冠戲沐猴力盡病騏驎伎窮老伶
優北山有雲根寸田自可耰會當無何鄉同作逍遙遊
歸來城郭是空有累累丘

召還至都門先寄子由

老身倦馬河堤永踏盡黃榆綠槐影荒雞號月未三更
客夢還家得俄頃歸老江湖無歲月未填溝壑猶朝請

黃門殿中奏事罷詔許來迎先出省已飛青蓋在河梁
定餉黃封兼賜茗遠來無物可相贈一味豐年說淮潁

次韻定國見寄

還朝如夢中雙闕眩金碧復穿鷄鷺行強寄麋鹿迹勞
生苦晝短展轉不能夕默坐數更鼓流水夜自逆故人
為我謀此志何由畢越吟知聽否誰念病莊烏

時方
請越

次韻蔣穎叔錢穆父從駕景靈宮二首

歸來病鶴記城闌舊踏松枝雨露新半白不羞垂領髮

軟紅猶戀屬車塵雨收九陌豐登後日麗三元下降辰

粗識君王為民意不才何以助精禋

前輩戲語有西湖風月不如東華軟

紅香

土

與君並直記初元白首還同入禁門玉殿齊班容小語

霜廷稽首法微溫

適與穆父並拜庭中地皆流濕相與小語道之

病貪賜茗浮

銅葉老怯香泉灑寶樽回首鵷行有人傑坐知羌虜是

游魂

東坡全集卷二十